


MAKASI EBONGI BE NA NZELA NA BOLEMBU EBONGI BE

 Mbote, baninga. Ezali esengo kobima lisusu na ntongo oyo, ntongo ya mbula ná neige esangani. Nayebi ete mingi kati na bino bazalaki na kokoso mpenza kokumba mituka, kouta mosika. Mpe tozali na mwa . . . baninga ya motuya oyo, baoyo bauti na Chicago, na Alabama, na Georgie, na Tennésí, na Illinois mpe na zingazinga, mikolo oyo, boye tozali . . . totii motema ete Nzambe akopesa bino bobateli na Ye wana bozali kosala mobembo. Mpe libondeli na biso ezali ete Ábatela bino na banzela nyonso, na banzela ya makámá oyo ekómaka na moselú na eleko ya hiver. Mpe etúka oyo ezalaka mabe na eleko ya hiver. Ezalaka etúka ya kitoko koleka na printemps to na automne, kasi na eleko ya hiver mpe na eleko ya été ekómaka mabe mpenza.

² Sikawa, nabanzi te ete bazali naino te kotia yango na bande kati kuna. Nalingi koloba likambo moko na ntina na liteya ya Lomingo eleki. Ntina oyo na—nakangaki bande yango mpe nalingaki te ete báteka bande yango, bábimisa yango, ee, ezali mpo nasengeli liboso koyoka yango malamú mpenza. Mpamba te, mbala mingi, ndenge wana, nalobaka makambo awa na losambo, oyo nakoloba te, liboso na bato libanda, ndenge wana, mpo ntango mosusu ebetisaka bato mabakú. Mpe ntango mosusu emema ata mituna katikati na bato na biso awa na tabernacle. Mpe ezali . . .

³ Nalobaka yango te . . . nalobaka makambo yango te mpo na kozala ndenge mosusu, kasi ntango mosusu, na nsé na epakweli, okoyeba makambo oyo okolinga te ko . . . olingaki kozala na mpiko ya koyebisa bato te. Boye ntango mosusu na nsé na epakweli, eloko moko ekobima, bomoni, mpe otikali kokeba na yango te. Mpe moko na makambo oyo nakanisi ete elobamaki (Lomingo wana eleki), oyo ekokaki kosala ete moto moko . . . ntango nalobaki ete natikálá kondima te likambo ya kobenga bato na etumbelo. Bomoni?

⁴ Nalingi koloba yango mpe kotalisa yango polele mpo bósosola. Na Biblia mobimba, etikálá kozala na likambo ya kobenga bato na etumbelo te. Likambo ya ndenge wana ezalaka te kati na Makomi. Esika moko te na kati ya bileko etikali kosalema liboso kino na eleko ya ba-Methodiste, eleki pene na mibu nkama mibale, bomoni.

⁵ Kobenga bato na etumbelo, ezali ntango bato bayaka liboso mpe balukaka kondimisa bango na makasi mpe kobenda bango, koloba: “Yaka, Yoane. Oyebi, bango . . . Mama na yo akufaki,

kobondeláká mpo na yo. Yaka, Yoane.” Wana ezali kondimisama te, baninga. Te. Ma—makambo ya ndenge wana, ngai. . . mbala na mbala mpenza bokoyoka te ete moto yango akei mosika mpenza. Mpe, kati na wana, bozuaka nyonso. Yango nde ntina oyolingomba ekómi na mobulungano mpenza ndenge ekómi lelo, ezali mpo na makambo ya ndenge wana.

⁶ Na oyo etali kondimisama, ozali na ntina ya koloba likambo te, ndeko, Nzambe azali wana mpe Asíli kosala mosala. “Wana Petelo azalaki naino koloba Maloba oyo, Molimo Mosanto akitaki likoló na baoyo bazalaki koyoka Liloba.” Bomoni? Bomoni? Bomoni? Kobenga bato na etumbelo ezalaka te, bomoni, likambo ya ndenge wana ezalaka te.

⁷ Sikawa, etumbelo ezali esika ya mabondeli, esika moto nyonso oyo ayei na losambo asengeli liboso kokende, kofukama na etumbelo, kobondela Nzambe na kimia mpe kotalisa bosenga na ye na libondeli mpe—mpe mpo na balingami na ye, mpe kotóndo Nzambe mpo na oyo esilaki kosalema mpo na bango, na nsima kozonga kofanda esika na ye.

⁸ Na bongo losambo ezali esika oyo Liloba na Nzambe. . . “Kosambisama ebandaka na Ndako na Nzambe,” esika oyo kosambisama na Liloba elobamaka. Na nsima. . . Kasi lelo, to—tobongolaka yango mingi mpenza.

⁹ Sikawa, nazotelemela moto moko te oyo abengaka bato na etumbelo, bomoni. Ezali. . . Ngai moko mpe nasilá kosala yango mbala mingi, mpe ntango mosusu nakosala yango lisusu mingi koleka soki nakobi na mosala. Kasi kaka mpo na ngai moko. . . Bomoni, bo—bo—bokongolaka mingi mpenza. Mpe eloko moko te ya kotelemela yango, ezali na mabe moko te. Ezali na yango malamumu. Bomoni?

¹⁰ Mpamba te, bóyoka, Yesu alobaki: “Moto moko te akoki koya epai na Ngai soki Tata na Ngai abendi ye te liboso. Mpe nyonso oyo Tata asíli kopésá Ngai akoya epai na Ngai.” Ya solo. Na bongo, bomoni, bazali. . . Yango ebwaki libanda na mobimba mpenza likambo na bino ya kobenga bato na etumbelo. Bomoni? Bomoni yango? “*Nyonso oyo Tata. . .*” Bino. . .

¹¹ Mo—mokumba na biso ezali ya “koteya Liloba.” Biblia elobi: “Baoyo nyonso bandimaki babatisamaki.” “Bóbongola mitema, mpe bóbatisama na Nkombo na Yesu Klisto mpo na bolimbisi, kolimbisama na masumu.” Nini? “Bóbatisama na Nkombo na Yesu Klisto mpo na bolimbisi ya masumu, bomoni, mpe bokozua likabo ya Molimo Mosanto.”

¹² Kasi soki bokómi kondimisa bato na makasi, kobenda mpe kobangisa bango, kolobela bato ba. . . Bato basengeli koya na makanisi malamumu, na lisosoli malamumu, wana bandimisami, mpo na koyamba Klisto. Na nsima, eloko ya liboso oyo bakosala, kaka ntango bayambi Klisto, wana bafandi na bakíti na bango, eloko oyo ekolanda ezali kobatisama na Nkombo na Yesu Klisto mpo

na bolimbisi ya masumu wana, ete bauti kondimisama na yango ete bazali na libunga. Na lolenge wana nde balimbisamaka na masumu na bango, bomoni. Mpo babongoli mitema; babatisami kotalisa lokola ekaniseli epai na bato ete: “Nayambi Klisto lokola Mobikisi na ngai mpenza”; na bongo, obelemi mpo na kozua Molimo Mosanto.

¹³ Mpe, sikawa, bato mingi bakóbaka kondimisa mpe kobenga bato na etumbelo, mpe bongo na bongo ndenge wana, ezali na yango mabe te. Naboi yango te, mpo na ngai, wana ezali mabe ata moke te, mpo na moto nyonso oyo alingi kosala bongo. Kasi, mpo na ngai, elongobani na Makomi te, bomoni, na boye ngai na—nalingaka kotikala na Makomi.

¹⁴ Yango nde ntina oyo nakangaki bande yango, ezalaki mpo soki bobimisaki yango, tolingaki koyamba mikanda nkama mitano ya koyanola na mposo moko. Nyonso. . . Yo nyatá kaka mwa momesano oyo moto moko azalaka na yango, mpe nde nyonso osengeli na yo kosala, na bongo okomona ndenge ekobanda lisusu.

¹⁵ Mpe nabanzi ete, mbala mingi, nalekisaka ndelo mwa moke ndenge natelemelaka makambo ya ndenge wana. Mpe nalingaka mpenza kozala lolenge wana te, kasi mbala mosusu misala nde ebendaka yo ndenge wana, bomoni, e—ememaka na ndenge wana. Na bongo nandimisami ete bato basosoli yango.

¹⁶ Sikawa, tozongisi matondi mingi ete tozali ntango nyonso na Tata moko ya boboto na Likoló, Oyo—Oyo atalaka mabunga na biso te mpe atángelaka biso yango te.

¹⁷ Nazalaki kotánga na Buku ya—ya Baroma, mokapo ya 4, epai Polo akomaki li—litatoli ya Nzambe mpo na bomoi ya Abraham. Sikawa, toyebi ete Abraham, mbala mingi, azalaki, tóloba, komitungisa lokola biso. Kasi ntango ba. . . litatoli na ye ekomamaki, balobelaki mitungisi na ye ata moko te, bomoni, batikálá kolobela yango te. Alobaki:

Abraham abetaki elaka na Nzambe ntembe te na nzela ya kozanga kondima; kasi akómaki nde na nguya. . . apesaki nkembo na Nzambe;

¹⁸ Bomoni, lolenge wana nde nazali kolikia ete oyo ya ngai mpe ekokamama kuna na Likoló, mabunga na ngai ná nyonso wana te, kasi bobele oyo namekaka kosala, mposa ya motema na ngai ya kosala mpo na libota na Nzambe.

¹⁹ Sikawa, toyei na ntongo oyo mpo—mpo na komeka koteya liteya moko ya moke awa, oyo, ntango mosusu, Nkolo asili kotia na motema na biso mpo tópesa yango na bato. Mpe kolikiáká ete ekosunga bino mpe ekosunga ngai, mpamba te tozali elongo mpe tozali kobika na ntango moko ya nsomo, mpe na mikolo ya nsuka. Boye, liboso tobondela, nakosepela kotánga bisika mibale kati na Liloba; moko liboso na libondeli, mosusu nsima na libondeli. Liboso, mpo na kobanda liyangani na biso, to, eteni na yango

oyo, nakosepela kotángana na Buku ya Baebele. Mokapo ya 11 ya Baebele, kobanda na molongo ya ntuku misato na . . . 32, ezali na ntina na *kondima*.

Sikawa, nakoloba makambo mosusu nini? to ntango ekozanga ngai kosoola makambo na Gedeon, . . . na Balaka, . . . Samasona, . . . Yefeta; . . . Dawidi . . . Samuele, ná basakoli:

Baoyo balongaki makonzi na nzela na kondima, basalaki na boyengebene, bazuaki elaka, bakangaki monoko na bankosi,

Bajimisaki nguya na móto, bakímaki mopotu na mopanga, mpe kati na bolembu . . . bakembisamaki, bakómaki bilombe na etumba, bakimisaki bibebe na mopaya, mampinga na bapaya.

Basi bazuaki bakufi na bango na lisekwa . . . bamosusu babetamaki makasi, mpo baboyaki kokangwa; ete bákoka kozua lisekwa lileki malamamu:

Bamosusu bazuaki mimekano . . . kotiolama mpenza . . . kobetama fimbo, ee, koleka oyo wana, kokangama na minyololo . . . na babolóko:

Babambamaki mabánga, bakátámaki biteni mibale na mosumani, bango bamekamaki, . . . babomamaki na mopanga: . . . batámbolaki na mposo na mpate mpe na mposo na ntaba; bazalaki kokelela, . . . mpe konyokwama;

20 Bótala paranthèse oyo malamamu:

(Mokili ebóngaki na bango te:) balemalemaki kati kati na masobe, mpe na bangómbá, mpe na malusú mpe mikaka na mokili.

. . . baoyo nyonso, atako litatoli epesami mpo na bango na nzela na kondima, bazuaki eloko oyo elakamaki te:

Nzambe abómbeli biso eloko eleki malamamu, ete bango bábonga be te, kozanga biso.

21 Ntango natángaka masolo wana, ya basodá ya mpiko wana, namitunaka soki mwa litatoli na biso ekotelema wapi liboso na oyo ya bato wana, na Mokolo wana.

22 Liboso tóbondela, moto moko akolinga ete tókanisa ye epai na Nzambe? Tómbola kaka loboko, mpe bosenga nyonso oyo ozali na yango, tika ete Ye ámona, áyoka mpe ápesa yo yango sikawa, wana togumbi mitó.

23 Tata na biso ya ngolu mpe bolingo, tobelemi na komikitisa na Ngwende na Yo na ntongo oyo na Nkombo na Yesu, Mwana na Yo, mpo na kosala libondeli mpo na biso moko mpe mpo na bamosusu. Tokosenga liboso, Nkolo, ete ólimbisa biso mabunga

na biso nyonso mpe lisumu na biso ya nko. Na nsima tokobóndela mpo na bamosusu, Nkolo, ete bango mpe bálimbisama.

²⁴ Mpe Lingomba na Yo ébélema pene na Yo koleka. Mpamba te, na bosolo, Nkolo, kati na motema na biso, tondimi ete yo obelemi mpo na kosala mosala moko ná Lingomba na Yo, obelemi mpo na kolongola Yango na mokili mpo énetolama kino na Bokonzi na Nzambe. Kasi, Nkolo, sunga biso mpo tómilengela mpo na ngonga yango. Tika ete ntongo oyo ézala ntango oyo, Nkolo, kobanda na moto moko kino na biso nyonso “tólongola bipekiseli nyonso ná lisumu oyo ekangaka biso na pete, mpo tóyika mpiko wana tozali kopota mbangu na momekano oyo etiami liboso na biso.”

²⁵ Mpe nabondeli, Tata na Likoló, lelo, ete Óbikisa babeli ná bato ya mpasi. Bato mingi bazali na mpasi na ekólo mobimba, na malózi, mpe “ba-virus” ndenge minganga babengaka yango. Nabondeli ete banguya na Yo ya kobikisa babeli, Nkolo, ézala na bato yango.

²⁶ Na nsima kokoma awa na losambo na biso ya moke na ntongo oyo. Bato mingi basili kokumba motuka mpo na bakilométre nkama na nkama, kobanda lobi na butu, mpe butu-butu kino na ntongo, lelo, mpe bakumbaki na mpasi mpenza mpo bákoka kokóma na tabernacle. Mpe neige ezali kokweya na nzela mobimba. E Nzambe, tobondeli ete Ópambola bango libanda na momesano. Na ntembe te, ebele basengelaki kosalela eteni monene ya mbongo ya bilei na bango ya mposa ekoya, to ya eloko ata mosusu, to biloko oyo bakokaki kosalela mbongo na bango mpo na yango, kosomba essence ná biloko mosusu, mpo na koya.

²⁷ E Nzambe, ye oyo akoya epai na Yo maboko mpamba, akozonga na bofúlu. Yo olakaki yango. Nabondeli ete Ótondisa mitema na bango mpe bikoló na bango (ya milimo na bango) ya kotonda mpenza na biloko malamú ya Nzambe na lolenge ete bázonga kofulukáká ná “esengo oyo ekoki kolimbolama te mpe etondi na Nkembo.” Tika ete bakópo ya bato na motuya oyo éfuluka na biloko ya molimo mpe ya malamú uta na Nzambe.

²⁸ Pambola loboko moko na moko, Oyebi bosenga oyo ezalaki nsima ya loboko yango, Nkolo. Nasengi ete Ópambola bango libanda na momesano. Tomonaki Yo na mposa oyo eleki, ndenge Oyanolaki na libondeli, na ndenge ya bikamwa mpenza, na ntango moke, na ntango ya mbalakaka, ya bokono mpe ya mitungisi. Ozali Nzambe, na bisika nyonso, oyo azalaka ná basali na Ye. Nabondeli, e Nzambe, ete Ózala pembeni na bango na ntongo oyo. Pesa bango mposa na bango, ya mitema na bango, Nkolo. Nandimi te ete ezalaki kaka mpo na bango moko, mposa moko—moko ya mabe nsima na yango. Nabondeli ete Ópambola bango.

²⁹ Sikawa, Tata, kanisa ngai, biso, lelo, mpe tika ete nákoka kozala na makoki ya komilongola na nzela. . . Biso nyonso, kobanda na mokengeli kino na—na bana mike, tika ete tózala na makoki ya komitia pembeni, likoló na etumbelo ya Nzambe, mpe ya kofungola mitema na biso mpo na koyoka Molimo Mosanto wana Akoloba na biso. Télémisa bambeki na biso mpo na oyo ya Yo mapamb- . . . mpo na koyamba mapamboli na Yo, na ngambo ya malamumu. Nsima na yango, sopa nguya ya Mafuta ya epakweli kati na yango. Mpe pesa biso makasi, Nkolo, oyo tosendeli na yango mpo na mikolo oyo ezali liboso na biso. Kokisa lipamboli yango. Tosengi yango na Nkombo na Yesu. Amen.

³⁰ (Hmm, nayebi te. Zua kaka numero na ye ya telephone mpe yebisa ye ete nakobenga ye nsima na losambo. Nayebi te.)

³¹ Bóbondela mpo na ngai. Ngai. . . Ndeko Jack Moore azali kosolola na telephone, mpe azali kokóba kondimisa ngai ete názala kuna na mposho oyo. Bomoni? Nazali mpenza komiyoka te. . . ete nakokoka kosala yango, bomoni, na bongo, nayebi likambo ya kosala te. Nalingaka Ndeko Jack. Likita monene wana oyo ekosalema kuna mpe aboyaki bato mosusu báya, ndakisa Booth-Clibborn ná bato mosusu. Boye atingami kaka, asili kolekisa mayebisi na ye mpe nyonso wana, alingi mpenza kaka ngai nákende. Na bongo ngai—nalingaka komiyoka mpenza ete natindami kokende, bomoni. Mpe ngai. . .

³² Mpe, sikawa, tofungola lisusu na Bakolinti ya Mibale, tokobanda na molongo ya 12 ya Bakolinti ya Mibale, mpe tokotángá molongo moko ya Makomi lokola motó ya liteya, soki Nzambe akolinga bongo. Bakolinti ya Liboso, mo. . . To, nde, Bakolinti ya Mibale, mokapo ya 12, molongo ya 9. Nalingi kotángá nzela ya liboso. . . To, nzela ya mibale ya molongo ya 9, ndambo na yango:

*Nde alobi na ngai ete, Ngolu na ngai ekoki mpo na yo:
jambi makasi na ngai ebongi be kati na bolembu. . .*

³³ Bótika ete nátángá yango lisusu sikawa mpo bósosola motó ya liteya malamumu:

*Nde alobi na ngai ete, (Oyo ezali Nzambe nde kolabáká
na Polo), Ngolu na ngai ekoki mpo na yo: jambi makasi
na ngai ebongi be kati na bolembu. . .*

³⁴ Na bongo, soki nasengelaki kobenga yango motó ya liteya, nakosepela kosalela oyo, makasi. . . *Makasi Ebongi Be Na Nzela Na Bolembu Ebongi Be*. Soki tozali na bolembu, tozali na makasi. Ezali libanda na momesano. . . na liyangani ya ba-Pantekotiste, koloba. . . kolobela *bolembu* lokola motó na liteya, mpo totatolaka ntango nyonso ete “tozali na makasi mingi.”

³⁵ Mpe nalobaki liboso, ete, namekaka bobele kobondela mpóso mobimba mpo náyeba eloko nini ekozala malamumu mpo na ngai koteya liboso na eyanganelo. Soki ezalaki bobele likambo ya

koya awa mpo bato báyoka ngai, nakosepela nde mingi mpenza koyoka moto mosusu kotelema awa na ntongo oyo.

³⁶ Ya solo mpenza, liboso na mikolo mibale to misato eleki, nazalaki na Kentucky ná libota ya Ndeko Gabehart kuna. Ntango nalongwaki esika na bango, ya ndeko ya motuya oyo ná mwasi mpe libota na ye, ná bamosusu, ntango wana nde likanisi oyo eyelaki ngai.

³⁷ Nautaki kokota na ndako moko, ntango moke liboso na yango. Natelemaki libanda, mpe mwasi yango alobaki: “Nalingi kosolola na motei wana.” Mpe nakotaki na mwa ndako na bango. Ezalaki na . . . Alobaki: “Yo nde Ndeko Branham?”

Mpe nalobaki: “Iyo madame.”

³⁸ Alobaki: “Nazali mpenza koyoka nsoni mpo na lolenge ya ndako na ngai,” mpe alobaki, “ndenge nasengi yo ete ókota.” Abandaki kolela. Alobaki: “Kasi na—nazali mpenza na bosenga mpe natieli yo mpenza motema.”

³⁹ Mpe nasósolaki ete ezalaki esika oyo Ndeko na biso ya mwasi Cox, oyo tofandáká na ye elongo ku—kuna, mwa—mwa nkóko moko ya mwasi, ná magnetophone mpe akendeke na yango zinga-zinga mpo na koyokisa ba-bande. Yango nde! Nde likanisi yango mpenza! Bomoni?

⁴⁰ Natambwisaki miso na kati ya ndako yango, mwa ndako moko ya bongo-bongo, lokola mpenza oyo nakolelaki, kasi etutú etondaki na bilíngi ya Klisto. Biblia moko ezalaki wana, likolo na mesa. Nalobaki: “Natikálá kozua naino lokumu ya koleka ya boye te na bomoi na ngai, oyo nde lolenge ya ndako oyo nasepelaka kokota.” Aséngaki libondeli mpo na moto moko. Mpe ngonga mitano nsima na ntango oyo tobondelaki elongo, nsima ngai ná mama nkóko yango tobondelaki elongo, Nzambe ayanolaki.

⁴¹ Boye tobondelaki lisusu, ngai, Mama Cox ná bango zinga-zinga na mesa na ntongo wana, togumbaki mitó mpe tosengaki na Nzambe ete ápesa biso libaku ya kosala eloko moko na nzela ya makasi oyo ye asilaki kosala. Pe, wana tosengaki yango, Nzambe afungolaki nzela. Bomoni? Azali Nzambe!

⁴² Tolukaka kosala ete bolembu na biso ézala elónge. Tolingaka kotalisa boni tozali minene, boni tozali bato minene. Nakanisi wana ezali moko na makambo oyo ngai . . . Nzambe apesaki ngai liteya oyo, ezali mpo na kobimisa likambo yango na makanisi na biso. Bomoni?

⁴³ Ezali na makambo mike-mike oyo tosalaka. Yango nde ntina oyo toyaka na losambo, ezali mpo na komona esika mabunga na biso ezali, ná makambo oyo tokoki kosala mpo na kokóma malamú koleka. Soki toyaka na losambo na ntina mosusu—ntina mosusu libanda na oyo, nabanzi ete koya na losambo ekosunga biso mpenza te. Tosengeli koya mpo na koyeba bolembu na biso,

koyeba bisika na biso ya mabe mpe ya biso . . . boni . . . komona moke boni biso tozali, mpe kotia elikia na biso na Moto oyo azali makasi. Kasi soki tozali na bolembu . . .

44 Ezali na bato mingi mpenza kati na biso oyo balingaka kotatola, to balingaka kokanisa ete tokoki te mpe, na yango, tokomisaka yango lokola libunga: “Ngai natángá te, nazali na makoki moko te, nakokoka kosala likambo *oyo* te.” Soki okobi bongo mpe osali yango ndenge wana, okobi kokende ndenge wana, na bongo okokoka kosala eloko moko te. Kasi likambo mpenza oyo tozali kosala yango mikálo, na babolembu na biso, Nzambe asalelaka likambo yango mpenza mpo na kosala na yango mosala. Bomoni? Azelaka ete tókóma na esika wana mpo Ákoka kosalela biso. To—tozuaka mikálo yango mpe tolobaka: “Ee, na—na—na—naza . . . nakokoka kosala likambo oyo te, nazali na makoki te. Na—nakokoka kosala yango te.” Mpe Nzambe azuaka eloko yango mpenza mpo na kosala mosala ná yango. Ya solo.

45 Yango nde ntina oyo A—Aponi biso, mpo tozali na lolenge wana. Sikawa, ezali koyokana ndenge, kasi nsima na ntango moke, tokokóma na ntina na yango, soki ezali mokano na Nzambe.

46 To—tomoni, wana tozalaki kotánga, ete babolembu mpe koboyama . . . mpe tomoni ete bato oyo bazalaka na botau koleka mpe baoyo baboyamaka na bato ya mokili, nde bazalaka bilombe ya Nzambe, baoyo balóngaka na ndelo ya bitumba, esengelaka na bato oyo bazali—bazali . . . oyo bamimonaka ete balongobani te.

47 Ezalaki na ndeko moko Metodiste, misato na bango, bayaka na losambo oyo, bautaka kuna na Ohio, to na nórdi ya Indiana. Balobaki na ngai, kala mingi te, balobaki: “Ndeko Branham,” balobaki, “touti kozua Molimo Mosanto, esengeli na biso sikawa koluka makabo mpo na lotómo na biso?”

Nalobaki: “Bósala yango te! Bótika likambo yango kimia.”

48 Abalukaki mpe atalaki ngai, alobaki: “Nauti kotánga buku ya ndeko moko boye oyo eyebisaki biso ete nsima na biso kozua Molimo Mosanto, biso ‘tosengeli koluka makabo,’ mpo yango ésalela Molimo Mosanto oyo.”

Nalobaki: “Mpo na kokóma na loléndo!” Bomoni?

49 Soki botali malamau na Biblia, ezalaka ntango nyonso baoyo balukaka kokima mosika na yango, nde Nzambe asalelaka. Na ntango nyonso oyo moto azali . . . alingi kosala eloko moko mpe akanisi ete azali mpenza na makoki esengeli mpo na kosala mosala yango, Nzambe akoki kosalela moto wana ata moke te. Bótala Mose, akimaki; bótala Polo, akimaki; mpe baoyo nyonso batikali, kolukáká kokima mosika na yango.

50 Nalobaki: “Bóluka eloko moko te. Soki Nzambe azali na eloko moko mpo na bino, Akopesa bino yango.” Bomoni? “Bótika Ye—bótika Ye átalesa likambo yango.” Nalobaki: “Boye, bokokóma na bayike ya bangonga oyo tozali na yango, oyo tokómi komona lelo, oyo moto nyonso alingi kosala likambo *oyo* mpe kosala likambo *oyo kuna* mpo na kokóma moto monene. Bótala epai oyo tokomi ná makambo yango, bomoni.”

51 Na esika ya koluka kokóma bato minene, tosengelaki koluka—koluka kotala ndenge nini tokoki kokoma bato mike. Bomoni? Bongo nde Nzambe akoki kosalela biso. Nazali na Makomi ebele oyo nakomaki awa, oyo nasengelaki kosalela, nabanzi, kasi ngai. . . biso. . . mbala mosusu nakozua ntango ya kosala yango te. Kasi tozali. . .

52 Bótala malamú ete esengelaka kozala mo—moto na bolembu koleka mpe oyo aboyami, mpe pene na bilombe nyonso oyo Nzambe asílá kotia liboso na etumba bazalaki bato ya ndenge wana. Moto oyo aboyamaki, moto oyo akanisaki ete azángáki makoki, moto oyo azalaki ata na makoki moko te, moto wana nde azali na lolenge esengeli mpo Nzambe ákoka kobanda kosalela ye. Ya solo. Ezali ntango bamonaka ete bakoki te, ete bazali na eloko moko te, ezali na ntango wana nde Nzambe akoki kozua bango mpe kosala ná bango likambo. Bomoni? Soki. . . Kasi ntango tokanisaka ete tozali na makoki ya kosala yango, na ntango wana Nzambe akoki kosalela biso te mpo tozali na mposa ya kosala yango biso moko.

53 Mpe, bongo, na ngámbo mosusu, tomiyokaka ndenge wana mpe tokanisaka ete tozángi makoki, mpe tolingaka kosala yango te; kasi, na ntango wana, soki toyoki mbela na Nzambe, yango mpenza nde likambo Nzambe alingaka ete tókota kati na yango, likambo ya lolenge wana, mpo Ye ákoka kosala.

54 Ntango biso moko tozángi makoki, na ntango wana nde tokoki komipesa na Molimo ya Nzambe. Na ntango nyonso oyo tokanisaka ete tokoki kosala yango, na ntango wana tokokoka kosala yango te. Kasi soki tokómi na esika oyo toyebi tokoki kosala yango te, na ntango wana tomipesaka na Nzambe mpe Ye akosala yango. Na bongo, soki biso nde tozali koluka kosala yango, tokokweya, kasi soki tomipesi mpenza na Nzambe, boye Nzambe akoki kokweya te. Ezali na eloko bobele moko oyo Nzambe akoki kosala te, ezali kokweya. Akoki kosala likambo mosusu nyonso, longola bobele kokweya. Kasi Akoki kokweya te.

55 Boye na ntango nyonso oyo tozali komeka biso moko, kotaleláká makoki na biso moko, mpe bongo na bongo, ee, tokosala eloko moko te. Kasi soki tokómi na esika oyo toyebi ete tozali eloko moko te, na ntango wana Nzambe akoki kosalela biso.

56 Likambo ya motuya, moko na makambo ya motuya oyo tosengeli kolónɡa. . . Sikawa, bómikanisela likambo oyo, mpe koleka mingi bino bilenge batei, ná bandimi mpe lokola. Ezali na eloko moko oyo tosengeli kolónɡa, soki tolingi kokokisa mposa ya Nzambe na bomoi na biso, ezali ete, tosengeli kolónɡa likanisi ya *makoki ya bomoto*. Soki totikálá kokóma na esika oyo tokanisi ete tokoki kosala likambo ná mayele na biso moko mpe makoki na biso moko, ete tosengeli kolónɡa yango na lolenge oyo tokoki kotika yango mpe kotia yango pembeni mpo Nzambe ákoka kosalela biso. Ya solo.

57 Mpe komípesá mobimba! Tokoki kosalela ata makoki moko te. Tosengeli komipesa mobimba! Mpe, mpo na kobeleva na Nzambe, esengeli kopesa Ye elimo, nzoto mpe molimo. Nyonso oyo yo ozali esengeli kopesama na Nzambe, mpo Ákoka kokokisa mokano na Ye kati na yo mpe kati na ngai.

58 Sikawa, ezali matata, nayebi, mpo tolingaka ntango nyonso kokotisa eteni na biso, eloko moko oyo biso *toyebi*, toyebi ete tolingaka kosala bongo. Tolobaka: “Ee, na—nayebi ete esengelaki kosalema boye.” Kasi na ntango nyonso oyo ozali kosala yango lolenge wana, ekosimba te, mpe Nzambe akotikáláká kosalela bokasi wana te. Ntango mosusu, na lisungi ya Nkolo, tokolobela yango nsima na miniti moke, kaka mpo na kotalisa bino ndenge Nzambe akoki kosalela makoki na bino te.

59 Mpe yango nde likambo ná mokili lelo: ezali na makambo mingi oyo bato babikeli na ba-seminaire, motuya mingi koleka etiamaka na makambo ya kelasi, motuya mingi koleka etiamaka na boyokani to na bondeko kati na ba-denomination, totianaka elikya bamoko na bamosusu, totiaka elikya na bato oyo bazali na makoki.

60 Biblia elobi: “Ndenge nini bokoki kozala na kondima, wana bo—wana bozali. . .” Tótala naino, Likomi yango elobi nini? “Ndenge nini bokoki kozala na kondima wana bozali na kopona-pona kati na bino?”

61 Ntango tozali kozela, koloba: “Moto oyo, azali moto monene. Oyo azali moto monene, nakotalela kaka ye,” yango esepelisaka Nzambe te ntango bosalaka bongo. Tosengeli kotalela Nzambe mpe bobele Nzambe! Tosengeli kotia motema na makoki na biso moko te to na moto moko te. Tosengeli komitika mobimba na Nzambe.

62 Makoki moko te, ata ezali ya nani, ekotikáláká kosalelama te liboso na Nzambe. Nzambe asengeli kobimisa makoki na biso nyonso liboso Ákoka kokokisa mwango na Ye. Soki Azali na likambo moko mpo na biso kosala, na ntango nyonso oyo tokomiyoka ete tozosala mosala malamú mpenza, na ntango wana, Nzambe akokoka kosalela biso ata moke te.

63 Sikawa, bokoloba: “Ozoloba wana likambo moko ya makasi mpenza, Ndeko Branham.” E—ezali likambo ya makasi, kasi bótala kaka zinga-zinga mpo na koyeba soki ezali solo to te.

64 Bótala zinga-zinga lelo misala na biso nyonso ya minene, oyo tokanisi ete tosalá, kasi wapi Boklisto na Etats-Unis? Bótala mangomba ná ba-denominations na biso nyonso, ná ba-evangeliste na biso ná mayangani ya lobiko na nzoto, mpe makambo mosusu nyonso oyo tozali na yango, kasi ezali nini? Mabe koleka ndenge ezalaki na ebandeli! Ekómi mabe mingi lelo, koleka ndenge ezalaki, mpo tomekaki kosala yango na makoki ya bomoto.

65 Basangaka elongo, babóndelaka ntango molai mpe babimaka awa. Mpe mokolo mosusu wana bazalaki mingi mpenza, nkóto mokama na ntuku mitano, to pene na yango ndenge wana, basanganaki elongo, ba-Protestant ná ba-Katoliko; basalaki mwa mabondeli, babondelaki mwa moke, mpe basalaki mwa mabondeli, mpe bongo na bongo. Ekokaki kozala ata malamau ete básangana na bango te, ezali ata na ntina moko te na miso ya Nzambe.

66 Sikawa, soki nalobi mabe, bólimbisa ngai. Bomoni? Kasi na—naza na . . . Osengeli kofandisa likambo yango malamau. Bomoni? Osengeli kosala ete sété ésimba malamau mpenza.

67 Bongo, malamau nini yango esalaki? Eloko moko te. Mpe ekotikáláká kosala eloko moko te kino moto nyonso oyo amibengaka Moklisto akobosana makoki na ye moko mpe ámípesa na Nzambe.

68 Na nsima nde Nzambe akoki kokokisa mwango na Ye na kotindáká . . . kolamuka te, kasi, ndeko, oyo Asengeli kosala liboso, ezali kotinda kufa, ezali solo, mpo *tókoka* kozua lisusu bomoi. Osengeli kokufa liboso ókoka kobótama mbala ya mibale, mpe osengeli ko . . . Asengeli na kokufa na biso moko. Tabernacle oyo esengeli na kokufa, ná ngai elongo ná yango. Bisu nyonso, tosengeli na—na kokufa mpo *tókoka* kobika lisusu na bomoi ya sika, esimbela ya sika, elikia ya sika, kobikela makambo ya sika! Tosengeli liboso na mokolo moko ya matánga.

69 Tosengeli na esika oyo ya komitika epai na Molimo, na esika ya kotalela mingi makambo ya kelasi mpe manáka na biso, mpe biso . . . ba-campagnes na biso ná makambo nyonso oyo tozalaka na yango. To—to—tokómi kotalela boyokani ná batei mingi ya ndenge na ndenge mpo na koyokana. Tokómi kopesa nzela na makambo mingi . . . “Soki tokoki kozua bato mingi mpenza te, ee, tokosala yango te. Soki tozangi yango, tokokende na bingumba yango te.” Na nsima, ntango tosalaka bongo, tozali kokómisa yango masíni monene mpenza oyo ezali na carbone kati na yango, bomoni.

70 Na bongo, to—tosengeli kozala mosika na yango, mosika na makoki ya bomoto. Tosengeli kokóma na esika oyo tokoki

kopesa milimo mpe bomoi na biso, ézala mwasi ya ndako, mosali bilanga, mobongisi mituka, to moto nani, tosengeli komipesa mobimba na Nzambe mpe koyeba ete “tozali eloko moko te.” Na bongo Nzambe abandi longwa wana. Na bongo Abandi koningana, kosala mosala. Wana etali biso nyonso, moto nyonso. Yango nde—nde eloko oyo tosengeli kosala.

⁷¹ Histoire ezotalisa, ezotalisa sikawa, (histoire) ezotalisa ete Nzambe aponaka ntango nyonso bato mpamba mpo bákóma bato minene na Ye. Nzambe azuaka bato oyo bazali eloko moko te.

⁷² Lelo oyo, soki otángá theologie moko ya malamu te, komeka na yo kutu kopusana pembeni na engumba te, komeka na yo kopusana kutu pembeni na liyangani moko te. Kasi soki otángá mingi, ná ba-kelasi ya minene ná makambo nyonso wana nsima na yo, okoki kokende na engumba nyonso mpe bakoyokana na yo, okozala na liyangani ya monene. Ee, ezali likambo ya liyangani te. . . Ezali liyangani, lokola mayangani nyonso mosusu, kasi ekosunga na nini? Bomoni, bino—bino kaka. . . Bokozua bana mike ya basi ná ya mibali oyo bákoya liboso, bakoliáká bazoká wana bazokende na etumbelo, ná basi ná mibali bakokendéké kuna bobele mpo na koloba ete “bakendeke na etumbelo,” bakokota na bisika ya kozua malóngi, bakobima mpe bakomwangisela bango mai to bakozindisama na mai, to makambo nyonso wana, mpe—mpe mobu moko na nsima. . .

⁷³ Moko na ba—evangeliste na biso ya minene koleka alobaki, soki akokaki koyeba ete akoki kobikisa bandimi na ye zomi likolo na mokama na mobu moko, alingaki kosepela. Ntango, na bongo, soki azalaki na bandimi nkoto moko, na mobu ekolanda basengelaki kokóma—kokóma nkóto zomi. Bomoni, tozozanga ntina, tozozanga kokokisa mwango.

⁷⁴ Bamosusu kati na biso batongaka yango likoló na mayele ya bongó: “Oh,” ete, “moyebi-makambo-nyonso oyo, moto atángá mingi oyo. Tosengelaki kotángisa bato na biso mpe kotinda bango na kelasi.”

⁷⁵ Baoyo mosusu batongaka yango likoló na koningana ya—ya nzoto, kolénga, kolela, kogánga, kobína na Molimo, to eloko moko boye, misala moko ya kotúntuka ya libanda. Yango mpe ezali mabe lokola mayele ya kelasi! Soki zabolo akoki kozua yo na ngámbo *oyo* te, akotindika yo na ngámbo *oyo kuna*.

⁷⁶ Kasi likambo mpenza ezali, kozanga eloko oyo okoki kotalela na ndenge na yo moko, to eloko nyonso oyo okoki kosala, bobele kopesa mpenza mobimba ya bolembu na yo nyonso epai na Nzambe, mpe koloba: “Ngai oyo.” Kozala na eloko moko te, na likoki ata moko te oyo okoki kotielala motema!

⁷⁷ Bóluká-luká na Makomi mpo na koyeba, ndenge nazali na biteni ya Makomi oyo nakomaki awa, mpo na kotalela. Mosusu tozongi kati na Makomi, tomoni ete Nzambe asalelaka ntango

nyonso bato mpamba mpo bákóma bato minene na Ye. Azuaka ntango nyonso baoyo baboyami na mokili, baoyo baboyami na eleko ya mikolo oyo, mpe lolenge ya bato wana nde Ye azalaki kolokota mpo na kosalela bango.

⁷⁸ Bótala ba—bantóma. Bókanisa naino Petelo, molóbi mbisi, atángá mpenza te, ná kelasi mingi te mpo na kokoma nkombo na ye moko. Yoane, atángá te, moingá. Nde bato yango! Ye atikaki pembeni bato na lokumu, ba-nganganzambe oyo batángá ná bato ya lokumu ya mikolo wana, bato ya mayele mingi, bandimi ya mangomba, mpe azuak-. . . bato oyo bazalaki kokanisa ete bazalaki bato minene, kasi alokotaki baoyo bazalaki bato mpamba mpe asálelaki bango.

⁷⁹ Sikawa, moto monene akoki kokóma moko na bato na Ye, Nzambe akoki kosalela bango soki babelemi mpo na kobosana ete bazali moto monene. Soki obelemi mpo na kobosana ete ozali *moto monene* mpe okómi *moto mpamba*, boye Nzambe akoki kosalela yo mpe kokómisa yo moto monene. Bomoni? Kasi osengeli kobosana ete ozali moto ya motuya mingi.

⁸⁰ Mingi kati na biso, mingi kati na biso tosalaka bongo na—na bomoi na biso. Kaka na ntango oyo. . . Bato mosusu, kaka ntango oyo bakómi Baklisto, bakómaka na loléndo, batioli, ya solo, nzokande bazali kolanda nzela oyo esengeli te. Bazali kozonga nsima, na esika ya kokende liboso. Ntango. . . koleka okoki kobimisa kati na yo moko, koleka okozala na esika mpo Molimo Mosanto ákota.

⁸¹ Ndenge Elisa ayebisaki Yosafata ná bamosusu, alobaki: “Bótímola mabúlu mingi awa. Mingi koleka bokotímola na bozindo, mingi koleka mpe bokozala na esika mpo na mai.” Mpe koleka tokobwaka libanda makambo na biso moko, bo—bosoto na biso moko ya makoki na biso moko, koleka mpe esika ekotikala monene mpo étondisama na Molimo ya Nzambe; na ntango nyonso oyo tokoki kosala bongo.

⁸² Polo, oyo touti kotángá na ntina na ye awa na—na Bakolinti, na Bakolinti ya Mibale, tomoni ete moto oyo azalaki moto monene. Azalaki moto ya mayele mingi, moto monene. Kasi asengelaki kobosana makambo nyonso oyo ye ayebáká, mpo áyeba Klisto.

⁸³ Nakotika. . . nakotángá moko na biteni ya Makomi oyo awa, mpo bo—bótángá yango elongo na ngai. Tózua, mwa moke, Bakolinti ya Liboso, mokapo ya 2 na molongo ya 1. Mpe tótángá awa, mwa moke, oyo Polo alobaki, moto monene ya mayele oyo, oyo alobaki na ntina na ye moko, oyo asengelaki kosala. Bakolinti ya Liboso, mo—mokapo ya 2 ya Bakolinti ya Liboso, kobanda na molongo ya 1. Bóyoka moto ya mayele oyo.

⁸⁴ Mobali oyo ayekolisamaki. Azalaki na makoki ya koloba pene na nkóta nyonso oyo ezalaki kolobama na mokili. Asengelaki komikumisa na ntina na yango. Abókolamaki na

lingomba ya makambo makasi ya Bafalisayi, mpe tata na ye azaláki Mofalisayi. Na nsima akómaki “Mofalisayi ya Bafalisayi,” elingi koloba ete akómaki—akómaki mpenza moto ya ma—makambo makasi koleka Bafalisayi. Azalaki moto monene. Azalaki na bokonzi, mpe azalaki moto ya mayele.

⁸⁵ Tata na ye atángisaki ye na kelasi ya molakisi malamumu koleka, oyo azalaki na ekólo mobimba, Gamaliele, na eleko wana, azalaki molakisi ya monene koleka na biteyelo nyonso. Polo mpe akómaki moto ya lolenge wana. Ayekolaki nkóta nyonso. Ayekolaki psychologie. Ayekolaki makambo nyonso ya ndenge oyo ezalaka na—na kati ya...oyo bayekolaka ndenge wana. Mpe azuaki lisungi monene kouta na—na eyanganelo ya ba-nganganzambe ná ba—bato minene. Mpe azalaki kokóba mpenza konyokoláká mpenza Lingomba.

⁸⁶ Bóyoka lisusu mobali moko oyo, ná mayele na ye nyonso, nsima na ye kondimela Klisto. Bóyoka likambo oyo alobaki. Ata azalaki makasi mpe monene ndenge nini, asengelaki kobosana yango. Asengelaki kosósola ete akokaki komitalela te. Asengelaki kosósola ete mayele na ye ya kelasi ezalaki mpamba. Asengelaki kosósola ete mayele nyonso oyo azalaki na yango, asengelaki kobosana makambo nyonso oyo atikálá koyekolisama yango. Bóyoka ye sikawa.

. . .ngai, bandeko, ntango nayezi epai na bino, . . .ná elobeli ya kokamwisa te . . .ya bwanya, bomoni, mpo na kosakwela bino litatoli na Nzambe.

“Natikali koya epai na bino te mpo na koyebisa bino: ‘Sikawa, Ngai nde Molakisi Saulo ya Eteyelo Sóngóló-pakala, ngai nazali . . .uta na lingomba monene na denomination oyo.’ Natikali koya epai na bino ndenge wana te.”

Jambi nazui ekateli ya koyeba eloko moko te na kati na bino, longola bobele Yesu Klisto, ye oyo abakamaki na ekulusu.

⁸⁷ Wana, boyoki litatoli ya moto ya ndenge wana.

“Nazui ekateli ya koyeba eloko moko te na ntina na makoki na bino. Nayebi ete eloko moko te ezali kati na bino mpe nazui bobele ekateli ya koyeba bobele eloko moko oyo namoni kati na bino, ezali Yesu Klisto, Ye oyo abakamaki na ekulusu. Mobikisi oyo abakamaki na ekulusu katikati na bino, nakondima bobele yango.”

⁸⁸ Bóyoka ye.

Mpe nazalaki na bino na . . .(bonene? Na nini?) . . . bolembu, mpe na kobanga, mpe . . .kolénga mingi.

⁸⁹ Bokoki kondima ete moto, Mofalisayi ya Bafalisayi, molakisi ya balakisi, moto oyo ayekolisamaki uta bomwana (mpo na lotómo) kokoma moto oyo ayebi koloba kitoko, oyo azalaki mayele mpe boyebi mingi, áya liboso ya bato lokola Bakolinti

mpe áloba: “Nazalaki ná bino na bolembu, na kobanga mpe na kolénga mingi”? Moto oyo aningisaki mokili, missionnaire monene koleka, oyo atikálá koyebana, atatulaki ete “ayaki na bolembu,” lokola moto ya mayele mingi te, kasi “na bolembu mpe na kobanga,” mpo ábima na Nzela te, esika moko boye. “Na kolenga mingi,” mpo akokaki kotalela makoki na ye moko te.

⁹⁰ Ntina oyo azalaki “kobanga,” ezali te mpo azalaki kobanga eloko moko, kasi azalaki kobanga ete ázanga kosepelisa Nzambe na lolenge moko boye, ete ásangisa makoki na ye moko kati na Yango; eloko moko oyo ayekolaki, oyo ye azalaki na . . . Azalaki koyebisa bango ete: “Nayaki epai na bino na elobeli ya kokamwisa te (nayaki epai na bino na *kobanga* ete náya na lolenge wana), kasi nayaki epai na bino koyebáká eloko mosusu te, bobele Klisto, Ye oyo abakamaki na ekulusu.”

Mpe nayaki epai na bino na kobanga, ná bolembu, ná kolenga mingi.

Mpe koloba na ngai ná mateya na ngai ezalaki na maloba na elengi ya bwanya ya bato te, kasi na misala oyo ezali komonisa Molimo mpe . . . nguya:

⁹¹ Bóyoka mobali oyo, oyo azalaki mobundi, ndenge amilongolaki ye moko. Amen! Soki ezali na eloko moko, oyo biteyelo na biso esengeli na yango lelo, soki eloko moko ezali, oyo mangomba na biso esengeli na yango lelo, ezali kolongola nyonso oyo ya bango moko, makanisi na bino moko ná makoki na bino moko. Bólongola nyonso ya bino moko liboso na Nzambe, soki te bokomeka kosala makambo na ndenge na bino moko.

⁹² Nabanzi ete bino . . . ete ezókota na bozindo mpenza na kati na biso, ézala awa, ná baoyo mpe bazali koyoka bande na mokili, ete bozali kosósola ete bosengeli kokóma bato mpamba. Moto-oyo-ayebi-nyonso te, moto ya monene te, kasi *moto mpamba*. Zalá . . . osengeli kokóma putulú. Osengeli kokóma na esika oyo oyebi ete ozali eloko te. Mpe komata likoló na yango ata moke te, mpamba te bobele ntango oyo omati likoló na yango, omati likoló na Nzambe. Osengeli komitika yo moko na kati ya putulú mpe na nzela ya Damaséke. Osengeli kozala na nsé ya mpunda na yo molai. Ezali mpo na bisika nyonso, mpo na baoyo awa ná baoyo bazali koyoka bande na mokili.

⁹³ “Elobeli na ngai,” alobaki, “ezali te . . . na maloba elengi ya moto mpe bwanya ya moto, kasi na kotalisama ya Molimo na nguya.”

⁹⁴ Sikawa, bótala malamú! “Mpo na nini, Polo? Mpo na nini osalaki bongo?”

Nguya! Mpo kondima na bino étongama na bwanya ya bato te, kasi na nguya ya Nzambe.

⁹⁵ Oh, motei nini oyo! Moto monene oyo . . . Alukaki Nzambe, mpe alobaki: “E Nzambe, nazali na bolembu, mpe na—nayebi te nini kosala. Nabondeli Yo bobele, e Nzambe, ete ópesa ngai makasi, ólongola bozangi na ngai, ná makambo wana, mpo nákoka kokóma na makasi koleka.”

⁹⁶ Nzambe ayanolaki ye, alobaki: “Polo, makasi na Ngai ebongi be na bolembu na yo.”

⁹⁷ Bongo, Polo alobaki: “Ntango nazali na bolembu nde nazali na makasi. Iyo!” Alobaki: “Na bongo . . . Nakomikumisa na bozangi na ngai, na bolembu na ngai mpe bongo na bongo. Nazali kotondo Nzambe mpo nyonso wana esili kobimá kati na ngai. Ntango nyonso wana ebimi kati na ngai, boye Nzambe akoki kokota. Kasi na ntango nyonso oyo mwa makoki na ngai moko ezali kuna, Nzambe akoki kokota te.”

⁹⁸ Wana nde mpenza, to—tokangeli Ye ekuke libanda. Tobengani Ye mosika na biso na . . . Kobanda na mobóla ya nsuka kati na biso kino na mozui ya liboso kati na biso, kobanda na moto moke koleka kino na moto monene koleka, totiki Nzambe libanda na bomoi na biso mpo na makambo na biso moko.

⁹⁹ Mbala mingi, nalobaka: “Monguna monene koleka ngai nazali na ye ezali William Branham.” Ye nde moto oyo akangelaka Nzambe nzela. Ye nde moto oyo akómaka goi-goi. Ye nde moto oyo akómaka, mbala mosusu, na esika oyo akanisaka ete akoki kosala likambo moko na ntina na yango, mpe, ntango asalaka bongo, yango elongolaka Nzambe na mobimba mpenza. Kasi soki nakoki kolongola moto yango, soki nakoki kokóma na esika oyo ye alongwe na nzela, na ntango wana nde Nzambe akoki koya kosala makambo oyo William Branham ayebi ata moke te.

¹⁰⁰ Na ntango wana nde Nzambe akoki kosalela yo. Na ntango wana nde Akoki kosalela moto nyonso kati na bino. Akoki kosalela moto nyonso ntango tolongwe na nzela. Kasi na ntango nyonso oyo tokomitiaka na nzela, boye tokokoka te. Malamu.

¹⁰¹ Sikawa, tomoni ete moto monene oyo, Polo, azalaki—azalaki mwana mokonzi katikati na batei. Denomination moko na moko ezalaki komemia ye. Moto yango akokaki kokende na engumba moko mpo na kosala mayangani ata na esika nini. Mpo na nini? Azalaki na mikanda ya kondimisa. Ee, azalaki moto monene mingi, mpe akanaki mpenza konyata bato nyonso oyo bazalaki na bolembu, na lolenge ete azuaki nguya ya nganganzambe mokonzi, mokonzi ya likoló koleka, mpo na kokanga Baklisto nyonso wana. Nguya ya politiki ya lingomba na ye, mpo na kokanga bango nyonso! Oh, azalaki makasi! Akokaki kokanga Baklisto mpe kobwaka bango na boloko mpo bayokanaki na ye te, na oyo etali malakisi na ye ya likindo, na oyo etali malakisi ya Bafalisayi ná Basadukayi. Azalaki kokanga Baklisto.

¹⁰² Kasi, bótala, asengelaki kokóma ye moko mokangami, mpo ákoka kobungisa yango, ákoka kobungisa makasi ná bokonzi na ye. Akómaki ye moko mokangami, mpo ábungisa nguya ya kokanga oyo azalaki na yango. Asengelaki kobungisa oyo ye azalaki, mpo ákóma mokangami.

¹⁰³ Nzambe atikaka bato ya lokumu! Atikaki banganganzambe. Atikaki bato oyo bazalaki na lolendo. Mpe Aponaki Polo, moto monene oyo, mpe akweisaki ye na putulú ya mabelé mpe kosala makambo oyo ye. . . lokola oyo bamosusu wana bazalaki kosala. Asalaki ete bákóma kosala. . . Asalaki ete ye ásala lokola bato oyo ye azalaki kokanga. Akangaki Polo na Molimo ya Nzambe, mpo na kokangola ye na nguya oyo azalaki na yango ya kokanga Baklisto. Okoyebisa ngai ete Nzambe ayebi eloko Azali kosala te? Alongolaki makasi na ye mpo na kosilisa mokande na—na ye.

¹⁰⁴ Batei boni oyo Nzambe akokaki kosalela na ntongo oyo soki bakokaki bobele kotika Nzambe ákanga bango na Liloba na Ye ná nguya na Ye, mpe ákangola bango na makasi ya badenominations mpe bibongiseli na bango! Bato ya bosembo boni bazali na engumba oyo, na ntongo ya lelo, oyo bakendaka na mangomba ya bibongiseli minene oyo, bato boni Akokaki kotondisa na Molimo Mosanto, mpo na kopelisa ekolo oyo na móto ya Nsango Malamu mpe nguya, soki bakokaki bobele kozua mpe komikangola na nguya oyo ekangi bango mpo bákangama na Molimo Mosanto, mpo na kozala lokola Polo, moombo ya bolingo mpo na Nzambe!

¹⁰⁵ Nzambe azuaki Polo mpe akómisaki ye moombo, akangisaki ye na Ye moko mpe atindaki ye epai na bato ya Mabota oyo azaláká koyina. Kasi, bomoni, asengelaki kokangolama na nguya na ye ya mangomba, mpo na kokangama na nguya na Nzambe. Asengelaki kobungisa makasi na ye mpe kokóma na bolembu mpe eloko te, mpo na kozua makasi ya Nzambe, mpo na kokangama na Nzambe, mpo na kosala oyo Nzambe alingaki koyebisa ye kosala.

¹⁰⁶ Yango nde tosengeli kosala lelo. Yango nde nasengeli na yango. Yango nde moto nyonso asengeli na yango: ezali komibungisa ye moko, kobungisa makoki na ye, kobungisa oyo ye azali, mpo ákoka komipesa mobimba na Molimo Mosanto. Mwasi ya ndako asengeli na yango. Mwana ya kelasi asengeli na yango. Tozuaka. . . ata bana na biso.

¹⁰⁷ Mwana mobali moko oyo nazokanisa, lobi nsima na nzanga to lobi oyo kuna, to mokolo moko, akendeki mpe azuaki yaya na ye ya mwasi ete ásalela ye mimekano ya kelasi noki-noki, abimaki mpe ayebisaki bana mibali ya mike yango, alobaki: “Fiuu! Mimekano yango ezalaki makasi te.” Bomoni, balakisami ko-triché, tóloba.

¹⁰⁸ Elingaki kozala malamumu koleka. . . Mpe bato yango bazali makonzi na kati ya lingomba. Elingaki kozala malamumu koleka

ete Papa, na ntongo moko, na ntango ya bilei ya ntongo, áloba: “John akosala examen na ye lelo. E Nzambe, zalá na John! Sungá John! Asengaki ngai na chambre na ntongo oyo, alobaki: ‘Papa, bondela mpo na ngai lelo, nakosala examen na ngai. Bóndela mpo na ngai.’”

¹⁰⁹ Nakosepela ete mwana na ngai ya mobali ázua “0” ya ma—malamu, sembo na lokasa na ye, mpe álonga te, na esika ete násepela koyeba ete azui “10” ya mobimba ya ko-triché. Iyo, misie! Eloko tosengeli na yango ezali komibumgisa, kotalela nguya na Nzambe na mobimba.

¹¹⁰ Sikawa, “kokangama.” Nzambe atikaka bato minene mpe azuaka bato na bolembu. Nzambe atikaka baoyo bakanisaka ete bazali eloko moko, mpo na kozua moto oyo ayebi eloko te mpo na kosala mwango na Ye na bomoi na bango. Yango nde tomonaka.

¹¹¹ Nzambe alobaki na Polo: “Makasi na Ngai ebongi be na bolembu na yo. Ma—makasi na Ngai ekomaka ya kobonga be koleka wana ozali kokóma na bolembu koleka. Koleka okokoka komipesa na Ngai, malamumu koleka Ngai mpe nakokoka kosalela yo. Koleka okokoka kobosana mayele na yo ya kelasi, koleka okokoka kobosana denomination na yo, koleka okokoka kobosana makambo na yo mpo na komipesa epai na Ngai, koleka Nakoki kosalela yo. Lokola okómi na bolembu, Nako—Nakokómisa mwango na Ngai makasi.”

¹¹² Nzambe akoki kopesa makasi longwa na bolembu! Yango nde ntina Asalaka bongo ntango nyonso. Ntango Aponaki bayekoli na Ye, nani akokaki kokanisa . . .

¹¹³ Komikitisa ya Mwana na Ye Moko ntango Abotamaki na elielo ya banyama, na ndako ya bosoto, ndako ya ngombe, mpe azingamaki na bilamba ya bosoto! Bomoni, Akokaki koya na ndako monene ya kitoko. Akokaki kokita na banzela ya Lola, mpe nyonso . . . Salúti mpenza ya Banje. Kasi Aponaki kokómisa Klisto Ndakisa na biso, mpo na biso, mpe Abókolaki Ye na komikitisa.

¹¹⁴ Atikálá koyekolisa Ye na biteyelo ya mokili oyo te, kasi Atángisaki Ye na nguya na Ye Moko, mpo . . . ete Ákoka komipesa Ye moko na mobimba, na makanisi ya moto te to na makasi ya mokili te, kasi Amipesa na nguya ya Nzambe.

¹¹⁵ Yango nde tokómi kosala lelo, lelo tokómi komipesa na denomination ná makambo na biso ya minene. Tokómi komipesa epai na denomination, oyo yango esengeli koloba, oyo *bango* balobi na ntina na yango. Kasi wana ekeseni na mokano ya Nzambe. Tosengeli komipesa na Molimo ya Nzambe mpe kokende esika Molimo alobi tókende. Ya solo.

¹¹⁶ Baebela ya Nzambe oyo biso, to, basodá ya Nzambe, kutu nde, “bilombe.” Touti kotánga na Buku ya Baebela, mokapo ya 11 mpe molongo ya 34.

. . . *longwa na bolembu, bazuaki makasi, . . .*

117 Basengelaki kokóma na bolembu liboso bákoka kokóma makasi. Longwa na bolembu na bango, nde bakomaki makasi. Bino baoyo bozokoma Makomi yango, ezali kuna, Baebele 11:34. Malamu.

118 Bótala eloko moko mpo na kobóndisa biso. Eloko moko oyo epesaka mpiko, yango oyo. Nzambe aponaka bato longwa na bolembu mpe komikitisa mpo na kotonga Bokonzi na Ye. Soki mokolo moko tokómi na Lola, soki mokolo moko tozuami Liboso na Nzambe ná Lingomba na Ye, tokozala elongo ná bato oyo bazalaki na bolembu, baboyamaki, baoyo mokili ebwakaki libanda, mpe baoyo bayebi-eloko-te.

119 Ezali kokamwisa te ete Nzambe akokanisaki biso na bampate? Mpate ezali nyama oyo eyebi komisunga te. Ezali na eloko moko te oyo ezangi mpenza makoki ya komibundela lokola mpate. Lapin ekoki kokima; esénde ekoki komata na nzete; mbwa ekoki koswa; nkosi ekoki kopasola; mpunda ekoki kobeta kisambéti; ndeke ekoki kopumbwa; kasi mpate eyebi komisunga ata moke te.

120 Mpe lolenge wana nde Nzambe alingaka ete tózala. Ntango tosósoli ete tozali mpenza na makoki moko te na nyonso, na nsima, Nzambe azuaka moto yango mpe abandaka komipesa lolenge Ye moko na kati ya moto yango; kosala ete maboko na ye ésala oyo Nzambe akolinga maboko ésala, kosala ete bibebu na ye éloba oyo bibebu ya Nzambe ekoloba; mpo ezali ya ye te, ekómi ya Nzambe. Abandi kotonga ezaleli, Abandi kolongola bolembu yango mpo na kosala makambo ya Ye Moko.

121 Amemi biso awa na mokili, mpe na nsima . . . Totángí, tozali na mayele mingi. Bosílá komona bakitani, mabota? Soki tozui, ndakisa, lokola Abele, longwa na Abele, Seti ayaki; libota ya Seti ekóbaki, kino na ntango ya Nowa, bango nyonso bazalaki kaka basali bilanga, na komikitisa. Kasi bana ya Kaína bakómaki na mayele mingi, mayele mabe, batángá, bato minene, batongi-ndako, banganga na mosala.

122 Kasi ngámbo ya Nzambe, ezalaki na bolembu mpe komikitisa. Wana nde ndenge Nzambe asalelaki bango. Wana nde libaku mpo na Nzambe kosala. Wana nde lolenge Nzambe abelemaka na biso: ntango tozalaka na bolembu. Na ntango yango nde tozuaka eloko moko. Yango epesaka mpiko, na bosolo, mpo Bokonzi mobimba ya Nzambe etongami na bato ya lolenge wana. Na bongo, ntango okómi na lolenge wana boye o—okoki . . . okoti na Bokonzi na Ye.

123 Likambo na biso ezali ete . . . ezali te ete tozali na bolembu mingi, likambo ezali ete tozali makasi mingi. Tozali—tozali—tozali nde makasi mingi. Esili. Likambo ezali ete tozali motó makasi mingi. Ya solo, tozali makasi mingi na mitó na biso. Toyebi mingi mpenza. Nzambe alingi kobimisa yango kati na

biso. Ya solo. Tozali makasi mingi, tozali makasi mingi mpo na komipesa na Ye. Tozali na . . . To—tomipesaka na biso moko. Tokómaka kokanisa: “Ee, sikawa, yoka, na—nazali na mayele ekoki mpo na koyeba!”

¹²⁴ Nakamwaki mingi, eleki mwa bampokwa, ntango mama azalaki kobela, na lopitalo. Nakendeki na . . . Mwa Mwasi moko azalaki na chambre oyo elandi . . . Soki elenge mwasi yango azali awa, ólimbisa ngai, ndeko mwasi. Azali elenge mwasi moko ya Kentucky kuna, mpe tozalaki . . . mpe oyo wana azalaki mama bokilo na ye. Mpe nazalaki kosolola na ye na butu wana, ngai ná mwasi na ngai, na bangonga ya liboso ya ntongo. Mobali na ye atandamaki na nse mpe alalaki mpongi; ye alobaki: “Bima awa! Ozali na ntina moko te mpo na mama na yo, ata bongo.” Abenganaki ye, mobali na ye, libanda ya chambre, mpo atandamaki mpenza liboso na ekuke, na lolenge ete ba-infirmer, moto moko te akokaki kokota; azalaki konguluma, na mabelé. Na bongo, atelemisaki ye mpe abimisaki ye libanda.

¹²⁵ Mpe abandaki kobeta masolo kuna. Nabandaki kosolola ná ye na ntina na Nkolo, mpe bongo na bongo. Mpe alobaki: “Ee,” alobaki, “nyonso oyo nga natikali koyeba ezalaki bobele kóngo ya nzete molai bazingá na nkasa ya tumbaku, na ntongo-ntongo, nazalaki kolongola matiti mabe zonga-zonga na ba-nzete ya tumbaku, mpe bongo na bongo ndenge wana.” Alobaki: “Kasi, ya solo mpenza,” alobaki, “papa atindaki biso nyonso na eteyelo.” Mpe alobaki: “Tozali na biso kaka na mayele mpenza te.”

Nakanisaki: “Ee, ntango mosusu yango nde ntina.”

¹²⁶ Bomoni, bo—bosengeli kozala mosika na makambo ya mokili. Sikawa, nalobi te ete boínga ezali malamumu, ezali—ezali bongo te, kasi nazali komeka kokanisa, ntango okómi na esika oyo okómi kokanisa ete o—oyebi mpenza mingi na lolenge ete moto mosusu te ayebi likambo moko na ntina na yango. Boyebi na yo ezali na yango mabe te na ntango nyonso oyo ezali te—ezali kotelemela bilaka na Nzambe te.

¹²⁷ Tokambamaka na biyokeli mitano, mpe biyokeli mitano yango (komona, koléta, komama, koyoka nsolo mpe koyoka) ezali malamumu mingi soki etelemeli eyokeli ya Kondima te. Bongo, soki etelemeli Kondima . . . Mpe bayebaka oyo ya malamumu ndenge nini? Mpamba te Kondima ekoyokana ntango nyonso na Liloba. Na bongo, soki—soki kondima na yo ekeseni na Liloba, to okanisi ete ezali bongo, na ntango wana ozali na Kondima te. Ozali na kondima-ya-maloba. Ozali na loléndo na biyokeli na yo, na makambo oyékolaki na kelasi, to eloko moko ya ndenge wana. Kasi ntango okabwani na yango mpe okómi koyekeme mobimba na Kondima, mpe Kondima ekoki kotongama bobele likoló na Liloba na Nzambe (Kondima ya solo).

¹²⁸ Mokolo moko, mónganga moko alobaki na ngai, alobaki: “Billy, nakanisi ete soki bato wana . . . soki oyebisi bango ete

bákende komama likonzí wana, nzete wana, mpe bandimi ete bakobikisama, bakobikisama kaka ndenge moko.”

¹²⁹ Nalobaki: “Te, misie. Ekoki kosalema te, mónganga, mpo na likambo bobele moko oyo, omoni: bato yango bayebi ete oyo wana ezali bobele likonzí. Bayebi ete nguya moko te to makasi moko te ezali na likonzí yango.”

¹³⁰ Kasi moto nyonso oyo azali na mayele akoyeba ete oyo wana ezali Liloba ya Nzambe na bomoi, ete nakoki kofandisa kondima na ngai likoló na yango mpe koyeba ete Ezali YANGO ELOBI NKOLO! Mpe soki eloko moko ekeseni na Yango, na bongo nakondimela biyokeli na ngai te. Te, misie, tika likambo yango. Landá eyokeli na yo mosusu, eyokeli ya Kondima.

¹³¹ Malamu, Nzambe azuaka bato wana mpo na kosala . . . Soki bakómi bato mpamba, bakomipesa na Ye.

¹³² D. L. Moody ya Chicago, azalaki moto ya Boston, azalaki mobongisi-sapáto; moto moke mpe mokuse, amikoka te, azalaki komitalela te. Sikawa, bózua biteyelo minene oyo bazali na yango, Eteyelo ya Moody oyo kuna, soki Dwight Moody akokaki kosekwa mpe komona eteyelo yango, likambo ya liboso oyo Dwight Moody akosala ezali kolongola eteyelo yango.

¹³³ Soki Martin Luther akokaki kosekwa, likambo ya liboso oyo akosala ezali kolongola ebongiseli ya ba-Luterien. John Wesley mpe akosala ndenge moko. Bato yango batikálá kobandisa bibongiseli wana te, ezali bato oyo balandaki bango nde basalaki yango.

¹³⁴ Polo atikálá kokómisa lingomba moko ebongiseli te, mpo ye moko alobaká: “Nsima na ngai kokende, bato na bitonga na bino moko bakotelema katikati na bino, bakoteya makambo ya kopengwisa.” Esalemaki nsima na liwa ya Polo, mpe mibu mokama (to nkama mibale) nsima na yango nde basálaki lingomba Katoliko, ebongiseli ya liboso.

¹³⁵ Bato batelemaki! Ezalaki nsima na liwa ya Moody nde basalaki Eteyelo ya Moody; nsima na liwa ya Wesley nde basalaki lingomba ya Wesley; nsima na liwa ya Luther nde basalaki lingomba ya Luther. Nzambe atindaka bilombe; mpe bango batongaka . . .

¹³⁶ Kokamwa te ete Yesu alobaki: “Bino—bino bitutú bipakolami mpembe!” Alobaki: “Bo—bobongisaka bankunda ya basakoli, mpe bino nde botiaki bango kuna!” Ya solo.

¹³⁷ Bato minene oyo batelemaki; na nsima, batongelaki bango ba-monument. Namilobelaka, lokola Dawidi: “Asalelaki Nzambe malamau na eleko na ye moko.” Boye, lolenge wana nde esengeli kosala yango. Tika bibongiseli ná biloko mosusu wana, ézala mosika na yo.

¹³⁸ Moody, mwa mobange mobongisi-sapáto, azalaki na bolembu. Azalaki ndakisa ya bolembu. Likambo ya liboso

elobamaka, oyo Moody asalaki... Akotaki kelasi ata moke te, mpe gramere na ye ezalaki mpenza mabe, ezalaki nsomo. Mokolo moko, moto moko ayaki epai na ye mpe alobaki: “M. Moody,” alobaki, “gramere na yo ezali mabe koleka nyonso oyo nayóká na bomoi na ngai.”

¹³⁹ Alobaki: “Nazólóngá milimo ná boínga na ngai, yo osalaka nini ná mayele na yo ya kelasi?” Nakanisi wana ezalaki eyano moko malamú. Ya solo mpenza!

¹⁴⁰ Sikawa, soki okómi moyekoli na Eteyelo yango, na ntembe te, okokóma moto ya mayele mingi mpenza. Ya solo. [Ndeko mobali moko alobi: “Babóngoli yango mpenza!”—Mok.] Sikawa, iyo, “babóngoli yango,” ezali solo, bazongi na ngámbo mosusu.

¹⁴¹ Yango nde bato basalaka. Ntango nalobaki, na ebandeli ya liteya na ngai. . . Na esika ete Baklisto bámikitisa mpe bábimisa nyonso oyo ezali kati na bango mpo na kopesa esika mingi na Nzambe, bazali koluka komítómbola na boyebi na bango moko, to na boyebi ya eteyelo ya tekini moko boye, to eloko mosusu, oyo ememaka bango mosika na Nzambe, koleka oyo bazalaki ntango babandaki.

¹⁴² Nde likambo oyo nakanisaka na ntina na kobenga na etumbelo, na ndenge ya bato. Bomemi ye, mpe mbala na nsima, ekokóma mpasi mbala zomi mpo na kozongisa ye lisusu. Bótika ya áfanda mpe áyoka kino ntango Nzambe akosala eloko moko mpo na ye! Na nsima botika ye áya koyambola yango, mpe átelema, kobéleláká Nkombo na Nkolo. Ya solo.

¹⁴³ Bótala Moody, atángaki mingi te, ayebaki koloba malamú te, azalaki koloba na zólo. Nazalaki kotánga lisolo na ye mokolo mosusu wana: “Azalaki koloba na zólo, mpasi na zólo.” Na nzoto, azalaki mokuse, ná libandi, mandefu milai kino na...? . . . ; mwa moto moko moke mpe mokuse mpenza. Na nzoto, azalaki mpenza na ntina te. Boye, azalaki bobele na bolembu na bolembu. Kasi Nzambe asalelaki ye mpo na koningisa mokili na eleko na ye!

¹⁴⁴ Mokolo moko, mopanzi-nsango moko akendeki na liyangani na ye (nazalaki kotánga yango), ná bapanzi-nsango, mpo na kolobela lolenge ya moto oyo ye azalaki (moto monene, moto ya lokumu).

¹⁴⁵ Wapi mwa butó wana oyo batelemisaka ba-bande? Ezali oyo? Nakosengela kotelemisa yango wana.

¹⁴⁶ Moody azalaki mo—moto monene. Azalaki moto malamú. Na bongo, azalaki na makoki ya kobenda bokebi ya bato, ya kosala ete báyoka ye. Bongo, mopanzi-nsango moko akendeki epai ya M. Moody mpe alobaki. . . akendeki na liyangani mpo na kokoma na ntina na likambo monene oyo. . .

¹⁴⁷ Wana mopanzi-nsango yango akobaki kokoma na ntina na mopalanganisi nsango-malamú monene mosusu kala mingi

te, alobaki: “Moto yango ayebi koloba. Azali Molakisi ya Bonzambe. Azali na gramere ya malamumu oyo nasilá koyóká. Bato bazalaki koyoka ye mpo na psychologie na ye. Ayebi kobenda bokebi ya bato.”

¹⁴⁸ “Dwight Moody,” ntango mopanzi-nsango yango akendeki, alobaki, “Nazomona te eloko nini ezali kati na ye, oyo ekoki kobenda bokebi ya bato.” Alobaki: “Likambo ya liboso, azali na elongi mabe mpenza. Ya mibale, na nzoto, azali na ntina moko te. Ya misato,” alobaki, “azali, atángá te. gramere na ye ezali mabe, koleka nyonso oyo nasilá koyóká!” Alobaki: “Alobaka na zólo mpe péma na ye esalaka makeléle ntango ateyaka.” Mpe alobaki: “Nazomona eloko moko te kati na Dwight Moody, oyo ekoki kobenda bokebi ya bato.”

¹⁴⁹ Bamemelaki M. Moody zulunale yango. Atángaki yango, asekaki mwa moke, alobaki: “Ya solo, ezali ngai te; ezali nde Nzambe. Ya solo mpenza! Bato bayaka komona Dwight Moody te, bayaka komona Nzambe.”

¹⁵⁰ Bato bazali na ntina ya litatoli na yo te, bazali na mposa ya eloko moko ya solosolo na kati na bomoi na yo, oyo ekotalisa polele ete Nzambe asimbi yo na loboko. Ózala Metodiste, Batiste, Pantekotiste, to nani oyo okoki kozala, bazali na mposa ya komona Nzambe. Ya solo, bato ya . . . bato minene, bato oyo bazali na bolembu mpe bayebi mpenza bolembu na bango.

¹⁵¹ Bótala Mose, elenge mobali ya mayele. Oh, azalaki moto atángá mingi. Ayekolaki mpenza bwanya nyonso ya Baezipiti na lolenge ete azalaki na makoki ya kotángisa Baebele. Azalaki na makoki ya kotángisa Baezipito. Azalaki na makoki ya kotángisa moto nyonso, mpo Mose azalaki moto monene, ya mayele mingi. Oh, azalaki moto na nguya mingi.

¹⁵² Na lolenge ya Cecil DeMille komonela yango, ntango—ntango asalaki film ya *Mibeko Zomi*, abengisaki mobali oyo azalaki . . . Nabosani nkombo ya moto oyo azalaki Mose na film yango, mosani moko, kasi azali engambe, ná maboko minene, moto ya makasi. Mpe ntango mosusu Mose azalaki moto ya lolenge wana.

¹⁵³ Toyebi ete azalaki makasi mpe ayekolaki malamumu, na bongo amemaki mokumba ye moko, komona bosenga ya mokolo yango. (Oh, tika ete Nzambe ákotisa likambo oyo na bozindo mpenza!) Komona bosenga ya mokolo yango, Mose, ná nguya na ye ya mayele ya bongó ná makoki azalaki na yango mpo na kosala yango na . . . Azalaki moto ya mayele mingi. Ye moto alingaki kokóma Fáló. Azalaki na psychologie. Azalaki na—azalaki na nguya. Azalaki na konzo ya nzoto. Azalaki na—azalaki na nyonso. Boye alobaki: “Nazali na oyo esengeli. Nayebi makambo nyonso. Soki ezali na moto moko na ekolo, oyo azali na makoki ya kosala yango, ezali ngai. Na bongo, ngai nde moto oyo esengeli, boye nakokende.” Mpe akendeki mpo na kokokisa

mosala oyo ezalaki malamu mpe na mokano ya Nzambe, mpe apesaki makoki na ye ya nzoto. Kasi Nzambe aboyaki yango! Akokaki kosalela eloko moko te oyo Mose azalaki na yango.

¹⁵⁴ Akokaki kosalela yango te na ntango wana, Akoki mpe te. . . Akoki mpe kosalela yango te lelo. Nzambe akoki kosalela makoki na biso ya nzoto te. Bisó nde tosengeli komilongola na nzela, ná makoki na biso, mpe komipesa na mokano mpe nguya ya Nzambe.

¹⁵⁵ Okoloba: “Ee, ndeko, nakoki koteya.” Akoki kosalela yango te, ntango nyonso oyo *yo* okoki koteya. “Ezali malamu, nakoki kosala likambo *oyo*, nakoki kosala likambo oyo *kuna*.” Okoki kosala eloko moko te. Ee, boye Nzambe akoki kosalela yango te. Kasi soki omipesi na Nzambe mpe otiki ete Ye ásala yango!

¹⁵⁶ Okoloba: “Ee, Ndeko Branham, nayebi. Nazali molakisi.” Ee, ntango nyonso oyo *yo ozali* molakisi, ee, Ye akokende mosika mpenza te. Kasi Molimo Mosanto azali Molakisi na biso. Ya solo mpenza, Ye nde! Nzambe atindaki Molimo Mosanto mpo na kozala Molakisi likoló na Lingomba.

¹⁵⁷ Bato mosusu bakendeke kelasi mibu na mibu na mibu. Basálaka nini? Batángaka makambo esalemaki na Eteni ya ndako ya Likoló, na bongo (oh, ezali malamu) boyekolaka malakisi ya eteyelo ya Lomongo ya Ekólo mobimba. Natelemeli yango te. Ezali Maloba na Nzambe, mpe nyonso wana, kasi esangisami ná mayele ya bongó! Esengeli kouta na nguya ná lisekwa ya Klisto, mpe bokoki koyekeme na makoki na bino ya bomoto te.

¹⁵⁸ Boye, Mose, elenge engambe kitoko oyo mpe makasi, moto ya mayele, akendeke mpo na kosala mosala ya malamu; kasi Nzambe akokaki mpenza kosalela yango ata moke te. Akokaki kosalela makoki na ye ya bomoto te.

¹⁵⁹ Mpe biso tokoki te. . . Ezali lelo te, nde tokoki te. . . Nzambe akoki kosalela makoki na biso ya bomoto te.

¹⁶⁰ Kasi Mose ezali na eloko moko Mose azalaki na yango oyo nasepeli na yango, azalaki na mayele ya kokoka mpo na koyeba ete asilaki kolongama. Bisó toza na yango te. Esili. “Tokobanda denomination ya *sika*. Tokozua moto mosusu oyo azali na likabo ya lobiko na nzoto, to eloko moko bongo,” ba-Pantekotiste, bomoni. Bomoni? Bisó to—toyebaka mpenza te mpo na kososola ete tosili kolóngama. Lingomba ya ba-Pantekotiste, ba-Assemblée de Dieu, ba-Pantekotiste Unis, ná bamosusu, emonanaka lokola bazangi makoki ya koyeba ete basili kolóngama. Aleluya! Oh, soki nakoki kokotisa likambo oyo malamu. Basili kolóngama. Ebongiseli ya lingomba esili kolóngama! Ndenge moko mpe, Etats-Unis oyo esili kolóngama, ezali kolenga mpe kobanga, ná ba-bómbe ezodiembela kuna mpo na bango, bayebi ete basakani mingi mpe basili komema bomoi na bango kino lifelo. Mpe basili kolóngama, Molimo esili

kotika bango. Esengeli na bino koluka-luka bilenge mibali na kati ya banzete mpo na kokómisa bango basodá; bamonaki eloko nini esálemaki na oyo mosusu. Tosili kolóngama! Lingomba elongami. Bayebi yango.

¹⁶¹ Mose asósolaki yango, bongo ayebaki malamumu mpenza. . . Nzambe amemaki ye kuna na nsima, na kati ya lisobe, mpo na kolakisa ye mwa bolembu ya bato. Amemaki ye kuna mpo na kolakisa ye ntina yan nyonso wana. Ayekolaki malamumu mpenza! Oh la la! Ayekolaki mpenza likambo! Nzambe azuaki mpenza ntango ná ye kuna na nsima! Boyebi, Mose azalaki moto na nkanda; mpe Nzambe apesaki ye mwasi na nkombo Sefora, ye mpe azalaki bongo. Boye, namoni ete makambo nyonso ezalaki mpenza kotambola malamumu te, na nsima kuna na esobe mpo na ntango moko boye, ntango bango mibale bazalaki kotomboka mbala moko.

¹⁶² Nakanisi ete mayele na ye ya bongó, ya ndenge psychologie esengeli kokonza moto, esungaki mpenza te, mpamba te ntango azalaki kokende na Ezipito, namoni ete Sefora azalaki naino na nkanda. Akataki ngenga ya mwana na ye ya mobali mpe abwakaki yango liboso na Mose, alobaki: “Ozali mobali ya makila mpo na ngai.”

¹⁶³ Nzambe asilikelaki ye mingi mpenza na lolenge ete Ye. . . Alukaki ye na esika ya kolala, soki Ámonaka ye, Alingaki koboma ye. Nabanzi ezalaki na makambo mike-mike oyo Nzambe asengelaki kolakisa ye kuna, bomoni, ete azalaki moto. Bwanya na ye nyonso ya Ezipito ná ba-nguya na ye nyonso ya mayele ya bongó, Nzambe akokaki kosalela ata moko na yango te.

¹⁶⁴ Boyáka koloba: “Sikawa, Nkolo, nayekoli na eteyelo mibu ntuku minei sikawa, nazali—nazali moyekoli ya mayele mingi. Nakoki kozongela maloba wana ya Biblia wana nakangi miso.” Nzambe akoki kosalela yango ata moke te. Bomoni? Te.

¹⁶⁵ “Oh, nasámbelaka na losambo ya monene koleka na ekólo mobimba. Na—nazali. . . Nazalaka *boye*, Nkolo. Oh, nazali Pantekotiste. Na. . . Nkembo na Nzambe! Nauti kozua Molimo Mosanto na butu eleki. Aleluya! Okosala ete násala likambo *boye-na-boye*.” Nzambe akoki kosalela yango ata moke te. Te!

¹⁶⁶ Soki olóngami mpe osósolaki ete osili kolóngama, na bongo, yaka lisusu mpe mikitisa. Kómá na bolembu, yéba ete ozali kaka moto. Mpe mayele na yo ekoki ata moke te ko. . . Nzambe akosalela ata moke te bolembu ya bomoto; Nzambe, na nzela na bolembu ya bomoto, Akomikotisa na kati na yo, na nsima Akomisalela Ye moko. Yo okómi kaka esalelo. Ya solo mpenza! Osengeli komilongola yo moko na nzela.

¹⁶⁷ Mose, oh, ayekolaki, ayekolaki malamumu mpenza bolembu ya bato. Ayekolaki yango malamumu mpenza, na lolenge ete, ntango Nzambe abengaki ye, azalaki na bolembu nsambo oyo akokaki

kotalisa mpo na kobundisa mbéla ya Nzambe. Botikálá koyekola yango na ebandeli ya Esode, bolembu nsambo yango? Na—nakomáki yango awa. Nalingi bóyoka yango. Bolembu ya liboso oyo azalaki na yango, ezalaki kozanga nsango. Bolembu ya mibale oyo azalaki na yango, ezalaki kozanga bokonzi. Bolembu ya misato oyo azalaki na yango, ezalaki kozanga koloba malamumu. Ya minei ezalaki bolongobani. Ya mitano ezalaki bolóngi. Mpe ya motoba ezalaki bondimami.

¹⁶⁸ Sikawa, yo, kokánisa oyo ya yo ná oyo ya ye mpo na komona soki okoki kozala ná yango, komona soki okoki kokóma na bolembu lokola ye. “Nkolo, na—nazali malamumu te. Nayebi koloba te. Na—na—nabomaki mo-Ezipito. Nakoki kozóngá te. Oh, nyonso wana! Bakoyamba ngai te. Nazali na nsango te. Nazali na . . . nayebi koloba te. Mpe na—nalobaka malembe.” Bomoni ndenge azalaki? Azalaki eloko te! Bandeko, asilaki kobikisama. Iyo, Nzambe akokaki kosalela ye na ntango yango nde, nsima na ye kobikisama. Bomoni? Iyo.

¹⁶⁹ Ezali. . . Akoki kosalela biso nsima na biso kobikisama, mpo tóyeba ete “Doctorat na ngai ya Philosophie, Doctorat na ngai ya Droit mpe Doctorat na ngai mbala mibale ya Droit,” to ézala ya nini, “ba-diplome na ngai nyonso ezali mpamba.” Nzambe akoki kosalela yango te!

¹⁷⁰ “Ee, nazali moto ya ba-Assemblée de Dieu. Nazali moto ya ba-Unitaire. Nazali mo-Baptiste. Nazali mo-Presbyterien.” Nzambe akoki kosalela yango ata moke te! Koleka okokabwana na yango noki-noki, ee, malamumu koleka mpe oko—oko—okomipesa mobimba na Nzambe.

¹⁷¹ Lokola mosakoli oyo alobaki: “Nazali moto na bibebu ya mbindo, mpe nafandi katikati na bato ya mbindo.” Mpe Mwanje akendeki mpe azuaki e—esimbeli, akendeki na etumbelo, azuaki likala ya móto mpe amamáki bibebu na ye. Na bongo agángaki: “Nkolo, ngai oyo; tándá ngai.” Iyo, nsima na ye kosósola ete a . . . Atako azalaki mosakoli, azalaki na bibebu ya mbindo.

¹⁷² Bobele na ntango oyo tosósoli ete tozali—tozali na biso eloko te, ete ozali na yo eloko te, ozali mputulú ya mabelé . . . Nzambe akoki kosalela yo te . . . Iyo, kobikela makamb-. . . Bolembu na yo nyonso ekokokana na oyo ya Mose te. Azalaki na bolembu motoba ekeseni awa, mpe ayekolaki bolembu ya bato.

¹⁷³ Sikawa bótala bokeseni katikati na Mose *wana*, ye oyo akutanaki na Nzambe, ná *Mose* oyo azalaki kotalela . . .? . . . lokola lelo. Alobaki: “Eh, tosengeli na *boye-na-boye*! Tosengeli na kolamuka kati na ekólo. Nakoyebisa bino nini nakosala, nazozonga mpe nakoyekola kino nakozua diplóme na ngai ya licence na Lettres. Ah-ha! Nazozonga mpe nakoyekola kino nakozua diplóme ya Doctorat na Philosophie. Nakoyekola lolenge ya kokoma ba-búku. Nakosala nyonso oyo, na nsima nakokende mpe nakokóma ‘moto ya ngonga oyo.’ Nakomelisa

bato nyonso oyo péma, baoyo babandaki awa.” (Oh, ndeko!) “Nakomitongela ndako ya ba-dollars milió misato. Nakosomba mituka ya cadillac koleka zomi. Mpe. . .” Oh, ndeko! Ekozala malamú—ekozala malamú ete óbanda na yo te, mpamba te osili kolóngama mpo na kobanda, omoni. Kasi likambo ezali ete bayebi yango te!

¹⁷⁴ Bakanisaka ete osengeli kozala na suki milelomilelo, mpe kolata kazaka ya smoking mpe koloba: “ah-men” ya kitoko mpenza, ná makambo ya ndenge wana, mpo na kozala mwana mokonzi. Wana azali mobobe mpo na mwasi moko!

Nzambe asengeli na mibali, mibali ya búlee, mibali oyo bakoki koningisa!

¹⁷⁵ Kasi lelo tolingi nde Hollywood. Tolingi eloko oyo—oyo esepelisaka miso. Tolingi eloko oyo ekoki koloba na mayele ya kotanga mingi na lolenge ete akoki kalalisa biso mpongi miniti mitano, wana ye. . . Lomingo na ntongo.

¹⁷⁶ Nzambe alingi bakaboli oyo bakopanza pole lokola kopela ya mikalikalí, baoyo bakokweisa lisumu kino na misisá, (ya solo) bakopikola yango.

¹⁷⁷ Kasi biso tokómi. . . Tolingi babateli na biso ya mayele ya kotanga. Bato mingi balingi mobateli oyo alobaka na mongongo ya nsé, moto oyo alobaka: “Iyo, molingami mpenza.”

Nzambe alingaka lokito ya nkake! Iyo, misie.

¹⁷⁸ Kobondela-bondela bango, ná suki na bango mikuse bakatá, bapakoli-pakoli mpe nyonso wana, mpe balati bilamba oyo ekangá bango nzoto, ná nyonso wana, kasi alobaka liloba moko te na ntina na yango.

¹⁷⁹ Moto monene moko abengisaki ngai na bureau na ye awa, (na bureau na ye te) na bureau ya esika ateyaka, eleki mwa ntango molai te awa, alobaki: “Nalingi kotiela yo maboko mpo ótika makambo wana!”

Nalobaki: “Komeka kosala yango te. Komeka kosala yango te. Te, misie.”

¹⁸⁰ Soki bopekisi yango, bopekisi Nsango. Bopekisi Nzambe, soki bosali bongo. Iyo, misie. Tozali na ntina na yango ata moke te.

¹⁸¹ Nzambe ayokelaki nde Mose mawa ná bolembu na ye nyonso wana, mpo na koloba: “Mose mawa ee, na ntembe te, likambo moko—likambo moko solo ekómeli yo, obwakisi diplóme na yo. Oh la la! Awa, iyo, ozalaki moto monene, moto na mayele, mpe eloko moko te ekokaki kopekisa yo. Ndeko, ozalaki na ba-Doctorat na yo nyonso ya Philosophe ná ya Droit, mpe nyonso mosusu wana, kasi sikawa oye kotatoláká ete ozali ekolo te, okoki kosala eloko moko te. Okómi—okómi mpenza na bolembu”? Te! Nzambe ayokelaki ye mawa te. Nzambe azalaki

ata moke te na mawa mpo na ye. Nzambe asilaki kobikisa ye na makambo nyonso wana. Ayokelaki ye mawa te.

¹⁸² Kasi tomoni, soki bozali kokoma yango, na Esode 4:14: “Nkanda na Nzambe epelélaki ye.” Nzambe ayokelaki ye mawa te mpo azalaki na bolembu.

¹⁸³ Okoloba: “E Nkolo, nazali komiyoka mpenza malamumu te, nandimi te ete nakoki kosala yango.” Nzambe ákoyokela yo mawa te; azali na mposa ya kosukuma yo mwa moke. Bomoni? Bomoni? Ya solo. Nzambe ákoyokela yo mawa te; A—Akoyokela yo nde nkanda. Ozali nde kokóma na lolenge oyo Ye akoki kosalela yo. Iyo.

¹⁸⁴ Lokola Mose abikisamaki, Nzambe akokaki kosalela ye. Azuaki kobika na ye, na bongo akómaki mosika na makoki ya bato. Azalaki lisusu na eloko moko te oyo akokaki kotalela na ntango wana, mpamba te a—alengelamaki na ntango wana mpo na mosala.

¹⁸⁵ Nzambe alobaki: “Mibu ntuku minei awa, Nasalaki ete yo ná Sefora bówelana mpe bóndongwana awa na lisobe oyo, mpo na koyeba soki okokaki kosósola ete ozali na bolembu ya bato to te, nzokande ozalaki kuna lokola mokonzi monene: ‘Mbote, Molakisi Mose. Mbote, Reverend, Misie. Iyo, misié. Mose, yo nde okokóma mokonzi. Nyonso. . . Bisó nyonso tosepelaka na yo.’ Sikawa okómi awa na lisobe ná etóngá ya ba-mpate ná mwasi moko ya nkanda makasi.” Bomoni? Yango esilisaki ye mpenza. Iyo, misie. Mose akomaki na mobulu, kasi Ye alobaki: “Sikawa Nakoki kosalela yo, ntango osósoli ete ozali eloko te. Sikawa pusana awa, pembeni na nzete oyo ezali kopela móto, Nalingi kotinda yo kuna.” Oh la la!

¹⁸⁶ E Nzambe, pesa biso lisusu bato ya lolenge wana, pesa biso lisusu bato basilá makasi. Yango nde tosengeli na yango, bato basilá makasi. Ya solo!

¹⁸⁷ Ezalaki na Yakobo, boyebi. Na ntango moko, Yakobo akanisaki azalaki moto monene, boyebi, ete akokaki kokosa bato mpe komílongisa na nyonso. Akendeki kotia bitápe ya nzete ya libene esika bampate ná bibwele ya bokilo na ye ezalaki, ntango bazalaki na zemi, mpe ekómisaki bango bampate ya matóno, bazalaki komibwaka ndenge wana ntango bazalaki kokende komela mai. Mpe, na mbala moko, Yakobo akómaki moto monene. Na ntembe te. Azalaki. . . “Bapesáká ye mpenza nkombo ya *Yakobo*, ezalaki libunga te,” Esau alobaki ete, “azalaki ‘mokosi’ ya solo.” Boye azalaki mobúbi. Azalaki komilukela na ndenge ya malamumu, kofúlukaká, akómaki na bitóngá minene, ná basi, ná bampate, ná bibwele, ná bangombe, ná—ná nyonso wana, azalaki na nyonso.

¹⁸⁸ Kasi na butu moko (oh la la!) mokolo moko, ntango akómaki na mwa mokélé na mai, alingaki kokatisa yango, akómaki na esika oyo Mwanje moko akangaki ye. Ndeko, Yakobo asalaki

makasi nyonso butu mobimba. Ya solo mpenza asalaki makasi nyonso ntango molai. Kasi ntango amitikaki, ntango alembaki mpe akokaki kosala makasi nyonso lisusu te . . .

¹⁸⁹ E Nzambe, tika ete lingomba ékóma ndenge wana, ékóma na . . . lingomba ékóma na esika oyo ekoki lisusu kosala makasi te ná makoki na yango ya bozalisi, kasi esengeli komipesa na Nzambe. Tika ete ba-Methodiste bámiyoka nsoni bango moko ete bazali ba-Methodiste. Tika ete ba-Batiste ná ba-Pantekotiste bámiyoka nsoni, mpe bátika kosala makasi na bango, mpe bámiyoka na Molimo.

¹⁹⁰ Na ntango yango nde Yakobo akómaki “mwana mokonzi ya Nzambe.” Biblia elobi ete akómaki “mwana mokonzi,” mpe nkomo na ye ebóngolamaki. Bomoni? Mpe—mpe, bobosana te, na ngámbo *oyo*, azalaki moto monene, ya makasi, ná nguya ya mayele; kasi na ngámbo *mosusu* akómaki mwana mokonzi moténgumi, na bolembu mpe botau, kasi azalaki na nguya liboso na Nzambe.

¹⁹¹ Iyo, okoki . . . Ebongiseli na bino ekoki kozala ya kopanzana biteni-biteni. Lokumu na yo mpo na bazalani, okoki kokóma “eyanganga esílá ngala” kobanda wana, mpo na bazalani. Ekoki kozala bongo. Kasi nakoloba na bino ete bokozala na nguya ná Nzambe elongo. Ekozala malamumu ete názala ndenge wana. Nakolanda nzela yango ntango nyonso.

¹⁹² Bayekoli bazongaki mpe basepelaki, mpo bazalaki na esengo ete balongobanaki mpo na komema nsoni ya Likambo yango mpe ya Yesu. Ya solo! Bakobenga yo “motúntuki.”

¹⁹³ Bimá mbala moko na esika yango, ésila nye. Míkangóla na makambo na yo ya: “Ee, tala, nazali Methodiste,” to “Presbiterien” to “nazali moto ya ba-Assemblée,” “nazali Unitaire, nazali na ngai malamumu lokola bino.” Malamumu. Bimá mbala moko na makambo yango, tika yango. Sala nyonso . . .

¹⁹⁴ Tika ete mwanje ákanga yo mbala moko, mwanje na Nkolo, oyo akopesa yo Solo ya Nsango. Tika ete ákanga yo mbala moko, okomikitisa kino na libatisi na Nkombo na Yesu, okomikitisa kino na makambo na Yango nyonso etikali. Iyo, ya solo, na ntembe te, okosala yango. Iyo, oko—okobosana makambo ya mayele nyonso wana.

¹⁹⁵ Eleki mwa mikolo, moko na baninga na ngai ya malumu koleka, moto malamumu, alobaki na ngai, azalaki kobima na bureau, nsima na kosilisa lisolo ná ye, abimaki na bureau, alobaki: “Ndeko Branham . . .” Mpe moto yango azali moko na bato oyo basungaka ngai na misolo mpo na mayangani kuna. Nakómaki na esika oyo nayebaki te lolenge ya kosala mpo na kokoba, nazalaki bobele kotalela Nzambe; moto yango azalaki kofuta banyongo nyonso. Iyo, moto malamumu mpenza! Mpe moto yango asalaki mobembo, kouta na engumba moko monene, ayaki awa eleki mwa bampokwa, atelemaki na bureau mpe alobaki

na ngai, na mpokwa moko, alobaki: “Ndeko Branham,” alobaki, “Nalingi koloba bobele likambo moko.” Alobaki: “Ezali ata na moto moko te, oyo azangi kolinga yo, na ndenge nayebi.”

Nalobaki: “Nasepeli na yango mingi.”

¹⁹⁶ Alobaki: “Ndeko Branham, ezali kaka na likambo moko, likambo bobele moko ya mabe.”

Nalobaki: “Ezali nini, ndeko mwasi?”

¹⁹⁷ Alobaki: “Ee, likambo yango moko ezali oyo, Ndeko Branham, ete soki okoki bobele kokakola na mwa Malakisi wana ozalaka na yango,” alobaki, “bibongiseli nyonso ekoyamba yo.”

¹⁹⁸ Nasósolaki na mbala moko, nakanisaki... Nalobaki: “Malakisi nini, ndeko mwasi?”

Alobaki: “Oh, libatizi wana na Nkombo na Yesu.”

¹⁹⁹ “Oh!” Nalobaki: “Kasi, ndeko mwasi, okokaki kokanisa te ete ngai nákakola na Liloba na Nzambe mpe nákoba kozala mosali ya Nzambe.”

²⁰⁰ Alobaki: “Ee, awa, naye kolobela ebele na batei ya engumba monene oyo.” Alobaki: “Soki okolinga koyebisa bango ete Mwanje na Nkolo, oyo apesaka yo mamono, nde ayebisaki yo likambo ya kobatiza na Nkombo na Yesu, na ntango wana bakoki kondima Yango.”

²⁰¹ “Ee,” nalobaki, “expérence na bango ezali na nsé koleka mai basokoleli basani!” Nalobaki: “Etali ngai te oyo mwanje moko alobi, soki elongobani na Liloba te, nakondima yango te!” Nalobaki: “Soki mwanje yango ayebisaki ngai likambo oyo ekeseni na Yango, nalingaki kondimela mwanje yango te.” Ya solo! Liloba na Nzambe ezali liboso, eleki banje nyonso mpe makambo nyonso mosusu! Mwanje ya solo... Nalobaki: “Soki ayebisaki ngai Yango te, nalingaki koyokela ye te.” Iyo.

²⁰² Mwasi yango ayebaki te nini kosala. Alobaki: “Natikála koyóka likambo ya boye te. Natikala koyeba Yango te.” Bomoni, yango mpenza. Boye napesaki mwasi yango mwa Makomi. Mpe alobaki: “Nazozonga mbala moko na ndako mpo na koyekola Kondimana ya Sika. Natikála koyekóla Yango te.” Bomoni, yango mpenza. Oh, la la! Oh, la la! Nde yango bozui. Oh, la la!

²⁰³ Tika komeka kotingama na yango. Mítika nde! Yango nde osengeli kosala: komitika. Yakobo, ntango amitikaki, akómaki malamumu, akómaki mwana mokonzi mpe akómaki na nguya liboso na Nzambe.

²⁰⁴ Ezalaki Dawidi *moke* ná molato na ye ya lingomba ya Saulo, nde akendeki ko—ko—kobundisa Goliate. Ntango Dawidi akendeki kuna kobundisa Goliate, ná molato ya etumba nyonso wana, atalaki zinga-zinga mpe atalaki na nsima, akomaki lokola bango nyonso, bongo alobaki: “Eloko moko ezali kotambola malamumu te awa.”

205 Na ntango nyonso oyo ozali lokola mokili, mpe ozali na boyokani ná mokili, mpe ozali kosala makambo ndenge moko oyo mokili ezali kosala, eloko moko ezali kotambola malamau te.

206 Dawidi alobaki: “Eloko oyo ezomonana lokola ekangi makasi. Nazali na Diplôme ya Molakisi, nazali na Doctorat ya Philosophie. Bomoni, nazali moto ya ebongiseli monene, nakokende kobunda ná biloko nyonso oyo ndenge nini? Nayebeli yango eloko moko te. Nayebeli yango eloko moko te!” Dawidi alobaki: “Bólongola ngai biloko yango.” Ya solo. “Soki nasengeli kobunda mpo na Nzambe, naboyi kozala lokola bibángábanga oyo batelemi awa, balati molato ya etumba oyo ezali na madusu. Nakoki kosala liyangani te. . .”

207 Mayangani mingi, bato mingi, batei mingi oyo bayaka epai na ngai mpe batatolaka ete bandimaka ete Nkombo na Yesu Klisto nde esengeli mpo na kobatisama, kasi balobaka: “Ebongiseli na biso ekobengana biso.” Bozali komilongisa mpamba! Bólongola molato ya etumba ya Saulo!

208 Bópesa ngai nguya mpe makasi ya Molimo Mosanto! E Nzambe, tinda ngai ná bilingóngo, ézala eloko nini (ézala moke ndenge nini), mpo na beta monguna mpenza. Ya solo. Tinda ngai, kasi kotika te ete náláta lokola bamosusu na bango, ná ba-Doctorat ya Droit, Doctorat ya Philosophie, Balakisi, ná makambo nyonso ya ndenge wana.

209 Dawidi alobaki: “Eloko yango ezomonana malamau te.” Alobaki: “Nayebi yango ata moke te.” Alobaki: “Eloko bobele moko oyo ngai nayebi, oyo nazali na yango, oyo na. . . Kuna na ngambo ya nsima ya lisobe, nazalaki kobókolo bampate ya tata na ngai.” Alobaki: “Nkosi moko ayaki, akangaki mwana mpate mpe akimaki na yango, mpe ngai nayebaki ete ezalaki mwana mpate ya tata na ngai, mpe, oh, na—na—nazali. . . nazalaki na bibundeli te, kasi nazuaki kaka bilingóngo na ngai mpe nalandaki ye.” Alobaki: “Nabomaki ye mpe nazongisaki mwana mpate yango.” Oh la la! Bango bazalaki wana, likongá na loboko, bakokaki kosala yango te.

210 Yango nde likambo lelo. Nzambe azali na bampate mingi oyo babúngá nzela, bibongiseli mpe nyonso wana esili koyiba bango, mpe kokótisa bango na psychologie. Nzambe pesa biso ba-Dawidi ná Liloba na Nzambe mpe nguya ya Nzambe, mpo na kokamba bango, ntango tokendeke kokutana na bingambe na mayele oyo (Ya solo!) bazali na ba-diplome ya Philosophie, ya Droit, ba-diplome ya Q.U.S.T., to nyonso oyo ekokaki kozala). Pesa ngai Liloba na Nzambe ná nguya ya Molimo Mosanto mpe, nayebisi bino, tokoki koboma bingambe nyonso na elanga. Ya solo! Tosengeli na bosenga ya bato oyo bakoki ko. . .

211 Ee, Dawidi azalaki eloko moko te na elanga ya etumba yango, mpo na kokende kobunda na engambe yango. Ye, ee, a—azalaki bobele mwana mobali ya moke. Mpe Biblia elobi ete

azalaki “motane,” mwana mobali ya nzoto moke mpenza, mbala mosusu ná mapeka egúmbámá, ná eteni ya loposo ya mpate amizipaki na yango. Azalaki na ba-diplome ya bato minene na mayele wana te, baoyo batánga mingi. Ayebaki eloko moko te na ntina na mopanga. Ayebaki eloko moko te na ntina na kelasi nyonso oyo Saulo. . .

²¹² Saulo azalaki moto ya mayele koleka oyo bakokaki kozala na yango, Episkopo Saulo. Ya solo, azalaki mbinga mpe molai koleka mapinga mobimba. Ee, ye nde—ye nde asengelaki kokende kobunda na ye, kasi azalaki kobanga.

²¹³ Mpe lelo, toyebi ete tozali na bosenga ya kolamuka. Toyebi ete bato bazali na bosenga ya koningisama kati na bango. Ekosengela na Molakisi ya Bonzambe te. Ekosengela na moto na bolembu (Aleluya) oyo akozua Liloba na Nzambe ná nguya ya lisekwa ya Klisto mpo na koboma eloko yango. Ekomema Klisto na ekólo na . . . mpo bato bámona ete Azali naino na makoki ya kofungola miso ya bakufi miso, kobikisa babeli, kosekwisa bakufi, mpe Ye azali Nzambe, Molongi! Amen. Tosengeli na Dawidi, oyo atáangi na biteyelo ya likindo te, tosengeli na moto oyo ayebi yango ata moke te, mwa mosali bilanga moko to eloko moko, mwa moto oyo azali na mapeka egúmbámá, oyo azali mpenza kitoko te mpo na kotala ye, oyo akotambola na nzela ná nguya na Nzambe.

²¹⁴ Ntango mama alingaki kokufa, alobaki: “Billy, natielaki yo motema mpe nandimelaki yo. Ozalaki makasi na ngai ya molimo, okambaki ngai epai na Nzambe.”

²¹⁵ Nalobaki: “Mama, ntango nazalaki mwana moke. . . Bankóko na biso, na ntembe te, bazalaki ba-Irlandais, tozalaka mwa moke na ngambo ya ba-Katoliko.” Mpe nalobaki: “Lingomba ezalaki koloba ete—ete bango—bango bazalaki etonga ya bato yango, ete bazalaki na nyonso, ete nyonso oyo bazalaki kosala ezalaki malamú. Ngai nakokaki kondima yango te, mpo ba-Lutherien balobaki: ‘Biso nde etonga ya bato yango, biso nde tozali na yango nyonso.’ Ba-Batiste balobaki: ‘Biso nde etónga yango, biso tozali na yango nyonso.’ Eleki mingi mpenza, ezali na bibongiseli ndenge na ndenge pene na nkama libwa.” Nalobaki: “Mama, nakokaki kotia motema na moko na yango te, oyo wapi kati na bango ezali malamú?”

²¹⁶ Sukasuka nasósolaki, nazali koloba yango na komikitisa mpe na bopolo, kasi nandimaka ete ata moko te na yango ezali solo. Ya solo. Ntango nazóngaki na Liloba na Nzambe, namonaki oyo Yango esalaki na eleko wana. (Na nsima, e Nzambe, tika ete biso nyonso tózonga kuna.) Ná bolembu, mpe lisungi moko te ya ebongiseli, lisungi moko te ya ba-denomination, lisungi moko te ya mabongisi ya lingomba moko boye, kasi na komikitisa mpe na nguya ya Molimo Mosanto oyo ekitaki na Pantekote, ná liteya moko oyo Petelo ateyaki na Mokolo ya Pantekote: “Bóbongola

mitema, moko na moko na bino, mpe bóbatisama na Nkombo na Yesu Klisto mpo na bolimbisi ya masumu na bino.”

217 Okotiyama ekanganeli te na kingo lokola bato na likindo oyo te, ná kingo ya elamba ebalusámá mpe ba-diplóme ya Licence en Lettre. Kasi, ndeko, okozala na eloko moko na loboko na yo, mpe ntango nyonso oyo Molimo na Nzambe ekokota kati na Liloba wana, Yango ekolóngá mpe ekozongisa bampate oyo babúngá na nzela. Amen! Tótatola bolembu na biso! Bóbwaka Malakisi na bino ya Bonzambe! Bóbwaka boyebi-makambo-nyonso na bino, ba-kálati na bino ya mangomba! Milongólá mobimba liboso na Nzambe, na elobeli ya molimo, mpe mímóná ete “olóngobani te!” Na ntango wana nde Nzambe akoki kobanda kosalela yo. Koloba yango bobele na monoko te, lobá yango uta na motema na yo.

218 Yakobo, Dawidi, basengelaki komilongola mobimba. Azalaki moto na bolembu koleka kati na bato nyonso.

219 Bókanisa naino basodá, ntango mosusu, nkóto zomi to nkóto mokama, oyo bazalaki likoló na ngomba. Bango nyonso bayekólá malam, bango nyonso bazalaki na ba-diplome ya Philosophie, bango nyonso bazalaki na makongá, bazalaki basodá. Moko na moko na bango azalaki Caporal *Songolo*, Likili *Songolo* (ata ba-Likili), General *Songolo*, Lieutenant *Songolo*. “General Mokonzi monene ya minzoto minei, Saulo, Episkopo, iyo, moi-Lokumu, Misie!” Bango nyonso batelemaki wana, bato bayékolá malam.

220 Monguna mpe ateleme likoló na ngomba, alobaki: “Bino etonga ya bibánga-banga.” Oh!

221 Mpe kuna na molako, mwa mwana moko ayaki, mapeka egúmbamá, (E Nzambe!), mwana moke moko mposo mwa motáne, ná mwa bilíngongo na mokongo, ná gateau ya raisin na loboko mpo na ndeko na ye. Mpe engambe yango abimaki mpe angángaki ya koleka mbala moko lisusu. Alobaki: “Bolingi koyebisa ngai ete bino bato botángá mingi oyo bozali awa, bokotelema wana mpe bokotika ete esuté ya Mofilistia wana ábeta móndenge na Liloba ya Nzambe na bomoi?” Amen! Alobaki: “Bozali kobanga ye?”

222 Saulo alobaki: “Soki olingi kokende, yaka awa. Nako—nako—nakotinda yo na eteyelo mibu ntuku mibale sikawa, mpe nakopesa yo di—diplóme ya Philosophie. Nakoyebisa yo likambo oyo nakosala, nakopesa yo diplóme na ngai.”

223 Alobaki: “Longola eloko yango.” Oh! la la! “Nazali na ntina na yango te.” Alingaki kotia motema na Nzambe. Alobaki: “Nayebi oyo Nzambe asalaki mpo na ngai ná elóko *oyo*, mpe nalengelami mpo na kotia motema na Nzambe liboso na makambo nyonso, ná yango.” Amen! Yango nde kobikela likambo ya Moklisto.

224 Ata Saulo, ntango asengelaki kolongola molato na ye ya etumba, alongolaki elamba ya lingomba, asalaki lokola Dawidi. Kasi ntango Saulo akómaki na nsuka ya nzela, alobaki: “Nasili

kobunda etumba malamumu.” Wana ezalaki monguna ya nsuka ya kolonga. “Nasili kobunda etumba malamumu, nasilisi kopota mbangu, nabateli Kondima. Longwa na sasaipi motole moko esili kobongisama mpo na ngai, oyo Nkolo, Mosambisi na sembo, akopesa ngai na mokolo yango.” Alobaki: “Nde bobele na ngai te, kasi na bango nyonso balingaka komonana na Ye.”

225 Kufa elobaki: “Kasi nakozua yo na miniti moke.” Nkunda mpe elobaki: “Kuna, nakonyáta yo.”

226 Alobaki: “E kufa, wapi esweli na yo? Nkunda, wapi elóna na yo? Nayebi ete nazali awa kati na boloko oyo ya Roma, nakangami minyolólo, na maboko nyonso, mpe na—nazali na bilembo ntuku misato na libwa ya fimbo na mokongo na ngai. Nazali awa ná mpisoli na miso na ngai, ezali kosala mpasi, na lolenge ete nazali lisusu komona te. Na miso na ngai ya nzoto, nakoki komona te, kasi nakoki komona motóle ya boyengebene oyo ezali kozela ngai kuna. Matíndí na ngai elembi. Naniokwami mingi likoló na mápa ya kala, enyángwá, oyo babwakaka awa, bampúku ematelaka ngai, ná ba-araignés ná nyonso wana, mpe nalembi mpenza.” Kasi akokaki kotelema liboso na kufa mpe koloba: “Wapi esweli na yo? Nkunda, wapi elonga na yo?” ná minyolólo koningana na maboko na ye. Aleluya! (Yango nde tosendeli na yango.) “Nkunda, wapi elóna na yo?”

Nkunda elobaki: “Nakopolisa yo, Polo.”

227 Alobaki: “Kasi Matondi epai na Nzambe, nasílá kozua elóna na nzela ya Nkolo na biso Yesu Klisto.”

228 Ntango akómaki na bolembu, makambo na ye ya—ya boyebi ya lingomba, ya ye . . . milúlú na ye nyonso esilaki kobima kati na ye. Mikanda na ye nyonso ya kobulisama na bonganganzambe, basilaki kobótola ye yango. Azalaki lisusu moto ya ba-Assemblée te, to e . . . ya moko na bango te. Bomoni, azalaki lisusu moto ya moko na bango te. Alobelaki mpe atelemelaki bango mingi na lolenge ete ba-episkopo wana bakómaki . . . balobaki: “Olingi koyebisa ngai ete moto oyo asali boloko mibu ntuku mibale kuna, na boloko ya Roma, akoki koyebisa biso ete tótika te basi na biso báteya? Ha! Koyebisa biso wana te,” balobaki, “toyebi malamumu koleka. Kútu, moto yango azali mpenza nani, mpo áyebisa biso ete tósala *boye* na *boye to boye*?” Balobaki: “Toyebi eloko nini tozali kosala.”

229 “Iyo,” Polo alobaki, “ezali na bato oyo bakotelema katikati na bino, baoyo bakobanda bibongiseli kala mingi te, bakotelema mpe bakotángwa mosika na Kondima ndenge wana, bazali na Molimo ya Nzambe te.” Alobaki: “Basili kobima katikati na biso mpo bazalaki ya biso te.”

230 Mpe, eloko nini esalemaki? Bakotaki mbala moko na lingomba Katoliko; longwa na Katoliko kino na ba-Lutherien; mpe bongo na bongo kino na oyo ya nsuka, ba-Assemblée de Dieu, ndenge moko, bazali kosala ndenge moko.

Longwa ebandeli, ndenge moko!

²³¹ Kasi, oh, mpo na mobali to mwasi oyo azali na bolembu mpenza, oyo azali kososola bolembu na ye, oyo akotika ete Nzambe ásalela ye! Nazali bobele kokoba koloba, nabanzi nalobi ntango molai mingi.

²³² Sikawa, ezalaki nini? Sikawa, azalaki... Dawidi azalaki moyinga koleka kati na bango. Akotaki eteyelo ya bitumba te, ayebaki eloko moko te oyo etali yango. Bongo, akotaki eteyelo te ya moko na etumba oyo ezalaki liboso na ye, kasi ayebaki ete Nzambe moko azali. Mpe azuaki eloko ya bolembu koleka; bango bazalaki na makongá, bilamba ya etumba, matimbó ná nyonso mosusu, kasi Dawidi azalaki na mwa bilíngóngo ná libanga kati na yango. Kasi, bomoni, ayebaki eloko oyo akokaki kotiela motema. Atatolaki bolembu na ye, kasi kondima na ye ezalaki na Nzambe.

²³³ Alobaki: “Nazali na ntina ya nguba likoló na ngai te mpo na komibatela. Nazali na ntina ya kokende kuna te, koloba: ‘Sikawa, bandeko, bokolinga koyokana ná ngai? Nazali moto ya ba-Assemblée, nazali moto ya Presbiterien, nazali Metodiste, nazali Batiste, bandeko, bokolinga koyokana ná ngai?’ Nazali na ntina ya koyeba makambo nyonso wana te. ‘Tala, nakolakisa yo ete na líbenga na ngai, nazali na diplóme na ngai. Nauti kozua Licence en Lettre. Nauti na Université *Songolo*, na—nayekolaki kuna. Nazali na yango. Oh, nakoki koloba! Nazali *boye* na *boye to boye.*’” Azalaki na ntina ya makambo wana te!

²³⁴ Nyonso oyo alingaki, alobaki: “Natii elikia na ngai na Nzambe mpe ngai wana nakei.” Yango mpenza. Mpe engambe yango akweyaki. Ya solo.

²³⁵ Yango nde tosengeli na yango lelo, ndeko. Tosengeli, lelo, na bato lokola Dawidi, ezali te kobikela makambo ya université.

²³⁶ Ezalaki Mika moke, Mika moke, mwana ya Yimila, mobólá, aboyamaki, babenganaki ye na ba-denominations nyonso mpo azuaki mpenza ngámbo ya Nzambe. Kasi mokolo moko, moto na Nzambe moko ayaki, nkombo na ye Yosafata, mpe kuna, alobaki: “Nalingi koyeba Liloba na Nzambe ya solo.”

²³⁷ Saulo alobaki: “Nazali na bango nkama minei ya malamu koleka otikálá koyeba te.” Alobaki: “Bango nyonso bazali na ba-diplome, bango nyonso bayékólá awa na eteyelo.” Alobaki: “Ee, bazali batei ya malamu koleka, oyo oyóká naino te.” Alobaki: “Nakoyeisa bango awa mpe tokoluka elongi na Nkolo mpo na yo.”

²³⁸ Kasi na bongo abimaki wana mpe atáláki zinga-zinga, Yosafata alobaki: “Iyo, nayoki moto oyo koloba *boye*, mpe nayoki moto mosusu koloba yango, kasi,” alobaki, “ozali na mosusu? Ozali na mosusu te?”

239 Nzambe alingaki kopesa nsango moko na motema ya sembo wana. Ezalaki bobele na moko na bango wana, kasi Nzambe azalaki na moto moko mpo na moko wana. Amen. Soki motema ya sembo ezali bobele moko, esika moko, Nzambe azalaka na moto moko mpo na ye. Yosafata azalaki moto ya solo-solo, mokonzi-oyo-abangaka-Nzambe, mpe azalaki na lisosoli ekoká ya koyeba ete masakoli na bango ezalaki lokuta. Ayebaki ete ekesanaki na Liloba, amen (Oh, Ndeko Neville!), Yosafata ayebaki yango.

240 Alobaki: “Ee, na—natali na búku mobimba, makomi oyo ezali awa na seminaire oyo, nazali na moko na moko na bango nyonso awa.” Alobaki: “Ee, bótala awa, oyo azali na . . . ee, bótala ba-diplome oyo azali na yango. Bótala oyo awa,” alobi, “bótala—bótala ba-diplome oyo azali na yango. Bótala Sidikiya awa, ye nde mokonzi na yango nyonso. Ee, azali episkopo, azali likoló na biso nyonso. Na ntembe te okondima maloba na ye!”

Yosafata alobaki: “Iyo,” alobaki, “na—na—na . . .”

241 “Ee, tala, tala, bango nyonso bazalaka na boyokani ná ye. Bango nyonso bazali liboke moko ya monene! Mpe okoki koloba te ete bazali Baebele te. Okoki koloba te ete bazali basakoli te, bótala, ba-diplome ezali kotalisa yango polele.”

242 Yosafata alobaki: “Iyo, na—na—nayebi, Akaba.” Alobaki: “Yango—yango ezali mabe te, kasi . . .”

243 Alobaki: “Eloko nini ozali . . . Ndenge nini ozali kotuna ngai soki mosusu azali? Eteyelo na ngai mobimba yango oyo! Bibongiseli nyonso ezali wana elongo.”

244 “Kasi ozali na mosusu te, oyo azali ya etonga oyo te? Moko azali te, na esika moko boye?”

245 “Ee, akozala ndenge nini? Akozala moyinga moko atángá te! Ee, moto ya ndenge wana okosala na ye nini?”

246 “Kasi—kasi nazali kaka kotuna yo, ozali na mosusu te, esika moko boye?”

247 “Oh,” alobaki, “iyo, moko ya ndenge wana azali.” (Kuna, oh, matondi na Nzambe mpo na yango!) “Moko ya ndenge wana azali, kasi,” alobaki, “nayinaka ye. Bango nyonso mpe bayinaka ye.” Alobaki: “Tobengáná, mpe babengáná ye na ebongiseli wana, bango nyonso.” Alobaki: “Ayaki awa mpo na kosala liyangani, tobenganaki ye libanda na engumba. Iyo, misie. Tozali na ntina na ye te. Ee,” alobaki, “azali na bolembu, mpe aúti na libota moko ya babola mpenza. Gramere na ye ezali mabe mpenza.” (Ah-ha, lokola Moody, boyebi.) “Iyo, elobela na ye ezali mabe mpenza.” Mpe alobaki: “Ya solo, lokola moto na likindo, azali na elobela moko ya mabe koleka oyo nayóká. Natikálá koyóka eloko moko lokola ye te. Oh, abukaka na ye mimesano na bango. Ee, ye moto abukaki na biteni-biteni Esakola ya Bantóma na bango. Natikálá koyoka likambo ya ndenge wana te! Oh,

abukaka yango mpenza, mpe bayinaka ye, ngai mpe nayinaka ye, bato nyonso bayinaka ye.”

²⁴⁸ “Oh,” Yosafata alobaki, “mokonzi áloba bongo te, kasi nakosepela koyoka ye.” Ayebi oyo Elisa alingaki koloba! Ayebaki yango.

²⁴⁹ Nzambe atikaki batei nyonso ya minene, ya makasi mpe ya mayele, mpe atiaki Nsango na Ye na kati ya elenge mobali oyo alobaki ete ayebi eloko moko te. Kasi asalaki nini?

²⁵⁰ Balekisaki ye na momekano, mpe balobaki: “Sikawa, lobá kaka likambo moko bango balobaki.”

Alobaki: “Nakoloba oyo Nzambe akotia na monoko na ngai, esili.”

²⁵¹ Alobaki: “Soki olingi kokóma na makasi sikawa, yeba ete ozali kaka . . . ozali—ozali lokola libanda na molongo awa, elenge. Kobosana te, basili kobengana yo na ebongiseli wana. Bakoki kozongisa yo na bondeko soki oyokani na bango na ntango ya mikakatano lokola oyo. Biso nyonso tozali komilengela mpo na kosala campagne ya monene,” alobaki, “soki okoki kaka koyokana ná ngai.”

²⁵² Alobaki: “Nakoloba eloko te bobele oyo Nzambe asili koloba!” Kokakola, bakanisi ete moto na Nzambe akoki kokakola Liloba na Nzambe? Te, misie, ekosalema te mpo na ye.

²⁵³ Alobaki: “Kasi ozali na bolembu. Outi na libota ya babola. Ee, oyebi nini, bakoki . . .”

“Oyo bakosala etali ngai te.”

²⁵⁴ “Ee, bakobanda komema yo na mpepo longwa na ekólo moko kino ekólo mosusu. Bakosala nyonso, omoni, soki o—soki bobele o . . .”

²⁵⁵ “Te, te. Nakoloba bobele oyo Nzambe akotia na monoko na ngai.” Nzambe atikaki bato nyonso wana, (iyo, misie, bosembo na ye nde esalaki yango) atikaki bato nkama minei mpe apesaki ye **YANGO ELOBI NKOLO!**

²⁵⁶ Bongo, bandimaki Yango? Te, misie! Balobaki: “Ezali **YANGO ELOBI NKOLO** te, seminaire na biso eteyaka makambo ya ndenge wana te. Ee, episkopo na biso ye oyo, asilá koloba liloba, ye moto akomaki milúlú yango. Biso nyonso tosangáni elongo, tosilísá biteyelo na biso. Nzambe azali ná biso elongo! Nzela nini Nzambe abimaki kati na biso ntango Ekendeki epai na yo?”

Alobaki: “Okomona, na ntango moke.” Ah-ha, ezali solo.

²⁵⁷ Azalaki ndenge nini? Azalaki na bolembu, kasi azalaki moto ya makasi koleka katikati na bango. Mpo na nini? Mpo azalaki na Liloba ya Nkolo. Oh, ndeko, ekosala bokesene nini na ntina na . . . eloko mosusu nyonso, na ntango nyonso oyo ozali na **YANGO ELOBI NKOLO?**

258 “He, Ndeko Branham, soki okokakola na ntina na libatisi na Nkombo ya Nkola Yesu, ee, tokobongisa mayangani minene na Chicago to na bisika lokola oyo.” Ha! Bokanisi ete bokosala yango? Ata bosangani wapi, ata bosali nini, ndeko, yo kangáma na YANGO ELOBI NKOLO.

259 Nalingi ete bamosusu na bango báyá koyebisa ngai esika Yango ezali na libunga. Bólakisa ngai kati na Liloba na Nzambe, esika nini Yango ezali na libunga. Iyo. Bakobundisa yango te. Te, misie. Kasi Ezali YANGO ELOBI NKOLO! Kangama ná Yango, soki bango nyonso babengani yo. Etali ngai te na bolembu ndenge nini okómi: “Na ntango yango nde nakómaka makasi.” Soki babengani ngai, Nzambe akoyamba ngai. Ah-ha, iyo. Nzambe . . . Soki babengani yo, Nzambe akoyamba yo.

260 Bómikanisela, Nzambe alokotaka ntango nyonso batiolami, bato mpamba. Na nsima Akómisaka bango *bato minene* mpo na Ye. Tokoki kozanga koyeba yango na bomoi oyo, kasi ekoyebana na oyo ekoya; bomoni, ezali yango.

261 Mpe Apesaki ye YANGO ELOBI NKOLO, mpo na nini? Akangamaki ná Liloba. Azalaki na Nsango ya malamú. Nzambe apesaki ye emononeli. Bamosusu bazuaki emononeli moko te. Bomoni? Azalaki na emononeli. Mpo na nini? Mpo akangamaki ná Liloba. Esika wana nde tomonaka bilembo ná bikamwa. Mpo ete. . . Bamosusu bamekolaka kosala lokola Yango, kasi ye akangámáki ná Liloba. Sikawa tosala noki.

262 Eliya, esalemaki ntango lingomba na ye ebenganaki ye mpe etikaki ye mpo na kolanda makambo ya mokili ya eleko wana. Nabanzi Eliya asanolaki bango na ndenge esengeli mpenza. Bobanzi bongo te? Boyebi oyo Eliya azalaki. Nabanzi, na ebandeli ya lotomo na ye, atelemaki wana mpe alobaki: “Ee, bino basi oyo bolukaka kokóma lokola Mwasi ya Mokonzi,” ná bikoti wana, boyebi, “Miss Yezabele! Bino basi ya mikolo oyo, bokómi lokola Mwasi ya Mokonzi ya mboka, kolata lokola ye, kosala lokola ye. Bino batei!” Oh la la, ndenge asokolaki bango mpenza! Bango nyonso bakobaki kokweya na lolenge ete moto moko te atikalaki.

263 Na bongo asengelaki kokóma na nsuka ya nzela na ye. Moto moko te alingaki lisusu koyokana ná ye. Moko te kati na mangomba yango elingaki kosala elongo ná ye. Lingomba na ye mobimba batikaki ye, bazongaki na mokili (ezali ndenge moko lelo), ya solo, bazongaki na mokili. Bobele moke mpenza nde bakobaki kozala, moko awa mpe moko kuna, koutáká mosika na ekólo mobimba mpo na komona ye, mpe bongo na bongo. Akómaki na esika moko ya mpasi mpenza, akomaki na nsuka mpenza ya mayele na ye.

264 Alobaki: “Nkolo, natelemaki ngwi na Liloba na Yo, nalobaki Solo. Kasi bango nyonso bakei na bango, moto moko te atikali awa. Nazangi, nazangi ata moto ya koteya.” Amen. “Iyo,

natelemaki ngwi na Liloba na Yo, Nkolo, kasi tala sikawa epai nakómi, ata moto moko te alingi koyamba ngai. Soki nakei na engumba, balobaka: “Tala mobange ya libómá wana. Iyo, iyo, tala mobange ya libómá wana azali koya na engumba, sikawa akobanda koloba—koloba bilobela na ntina na bomoi ya mikolo oyo mpe nyonso wana.”

265 “Bóyamba ye te! Mokengeli, bóyokana ná moto wana te! Te, misie!”

266 Mokengeli: “Sikawa mobange ya bilandálanda wana ayei lisusu na engumba. Bomoni, Eliya wana kuna, mobange ya tata libandi wana. Bólanda makambo ya mobange ya tata wana te. Bótala ye, alataka ata lokola moto ya lingomba te, bilamba ya banganzambe lokola oyo ya ngai (ekoti na ye, boyebi; mpe atelemi na liboso, ná nzambala na mokongo, boyebi.)” Alobaki: “Aza te...” Alobaki: “A—a...ba...azali moto ya ndenge mosusu...A—azali moto moko ndenge.”

267 Mpe nabanzi ete bato minene mosusu balobaki: “Boyebi nini? A—azobela ba-nerf. Ah-ha, iyo, a—azali na mwa libómá, afandaka kuna na esobe, kofandáká ntango mingi kuna na zámbe, ákoyáká ná eteni ya mposo ya mpate amizingi na yango. Oh! la la! Na nsima kopámeláká basi wana! Natikálá komona likambo ya boye te. Bómeka te...bó—bó—bózala na eloko moko te ya kosala ná ye! Bóyokana na ye te!”

268 Ee, lisanga ya batei bayanganaki erlongo, boyebi, balobaki: “Bino—bino nyonso bózala na eloko moko te ya ko...Bótika ye ye moko, nsukasuka ako...akokóma na nsuka ya mayele na ye. Bótika ye—bótika ye ágánga kino bongó na ye moko ekobima ye. Esili, bótika ye.”

269 Kasi mobange Eliya, oyo azalaki kotambola sémbó ná Nzambe, (Oh! la la, la la!) akangamaki mpenza ná Liloba. Bazalaki na liyangani moko ya moke kuna, abwakaki miso na eyanganelo, alobaki: “Bino nyonso ba-Yezabele!”

270 “Oh, abángaka likambo te! Nakokende lisusu koyoka moto wana te! Te, misie, nakomeka ata moke te!”

271 Yango epekisaki ye te, akangamaki na yango ndenge moko. Ntango abungisáki lingomba na ye, ntango abungisáki...ba-denominations nyonso etelemelaki ye, ezalaki na ntango yango (ntango akómaki na bolembu) nde alobaki: “Natikali bobele ngai moko, mpe bazali koluka koboma ngai.” Alobaki: “Bakoki ata kobeta ngai masasi soki bazui libaku yango.” Ah-ha. Bomoni? “Kasi ngai...Bazali koluka bomoi na ngai. Mpe natikali bobele ngai moko, Nkolo, násala nini?”

272 Ezalaki na ntango yango nde, ntango akómaki na bolembu (atako azalaki sémbó, kotátóláká bolembu na ye mpe nyonso wana), nde Nzambe alobaki: “Yaka likoló na ngomba, Nakopesa yo nsango ya sika. Nakotindela yo sikawa nsango moko ya sika. Nasilaki koyebisa yo: ‘Kende kopámela makambo oyo,’ sikawa

Nakotinda yo lisusu kuna ná eloko moko mpo na kotalisa ete Ezalaki solo.” Alobaki: “Osali mosala malamú, Eliya. Olobeli bango likambo ya Mwasi ya Mokonzi, ná nyonso wana, ná ndenge basalaki. Opámelaki Akaba ná makambo na ye nyonso ya mpamba ya mikolo oyo, ná mangomba nyonso ya mikolo oyo, mpe totiaki batei wana na esika na bango. Ozalaki ndakisa. Otelemaki wana ná lisungi moko te, ebongiseli moko te, eloko moko te nsima na yo, kasi okangamaki ná Liloba na Ngai. Sikawa Nakopesa yo eloko moko. Kende kuna koyebisa mokosi wana: ‘YANGO ELOBI NKOLO! Ata mamwe ekokita te, longwa na Likoló, kino mokolo ngai nakobengisa yango.’” Oh la la! la la! Amemaki ye likoló na ngomba mpo na kolakisa ye eloko moko!

²⁷³ Oh, nakoki komona ye na ntongo wana, ákoya, kotamboláká na nzela ya Samalia. Na miso boye, azalaki mpenza kitoko te, ya solo, moto ya libandi wana ezalaki kongenga na moi, nsuki ná mandefu ya mpembe ekitá na elongi na ye, alataki eteni ya mposo ya mpate. Biblia elobi ete azalaki na “nsuki mingi,” nsuki nzoto na ye mobimba, nabanzi, ezalaki kitoko te kotala ye; mwa língénda wana ya kala na loboko, mwa miso mike kotaláká na likoló, wana azali kotambola na nzela. Mpe bino. . . ye. . . nabanzi ete azalaki kosala makambo lokola mwana ya mibu zomi na motoba, kasi azalaki na mibu ntuku mwambe. Ye wana azali koya, kotamboláká na nzela, sémba kino na Samalia. Ndeko, autaki kopesamela makasi bongo, kati na bolembu na ye: “Makasi na Ngai ekoki mpenza. Komitungisa te mpo na bibongiseli, Eliya. Komitungisa te mpo na yango, makasi na Ngai nde nyonso oyo osengeli na yango.”

²⁷⁴ Nayebi lisusu mokolo moko, nazalaki ya kotelema pembeni na tempelo moko ya monene, mpe nalobaki: “Nkolo, nalingaka te ete bango báya na—na bureau na ngai.”

Alobaki: “Ngai nazali Eteni na yo.” Bomoni? “Ngai nazali Eteni na yo.”

²⁷⁵ “Kati na—kati na bolembu nde Ngai—Ngai nazalaka. . . Makasi na Ngai ezalaka makasi. Mokano mobongi be na Ngai ekoki kosalema (Polo, to Eliya, ózala nani) ntango omílongoli na nzela.” Bomoni? “Kati na bolembu na yo, nde Ngai nakómaka makasi. Ngai nazali Oyo wana! Ngai nde Oyo ya Makasi oyo akotaka mpe atondisaka.”

²⁷⁶ Nakoki komona ye ndenge azali kotambola na nzela wana ya Samalia, miso mike na ye ya mobange kotaláká ndenge wana, moninga, ná elongi na ye lokola moto ákoseka moke. Ndeko, akendeki mbala moko liboso ya Akaba. Abetaki monoko ata moke te, atatabanaki ata moke te. Te, te! Na nse ya mwa ntólo ekónda wana, motema moko ezalaki kobeta, Molimo Mosanto efandaki na kati kuna. Iyo, ya solo mpenza! Ákoya na kotamboláká na nzela wana, abelemaki semba mpenza liboso

na Akaba, mpe alobaki: “Ata mamwe ekokweya te kino ngai nakobengisa yango.”

277 Atútáki makolo na nsé, abalukaki, mpe asimbaki nzela mpo na kozonga na esobe. Alobaki: “Osali mosala malamú, Eliya. Yaka awa, Nasili kopesa mitindo na biyanganga nyonso ete báleisa yo sikawa, mpe ba . . . mpe fándá na yo awa mwa moke.” Oh! la la!

278 Ntango azalaki na bolembu, bongo nde akómaki makasi. Iyo, misie. Akangáki likoló mpo mvula ébeta te. Na ntango yango nde akómaki makasi, ntango azángáki lingomba na ye, azángáki nyonso oyo azalaki na yango, ná makambo nyonso mosusu. Kasi akangámaki ná Liloba na Nzambe, na ntango wana nde akómaki na nguya ya kokanga likoló.

279 Ntango Yakobo abungisaki makasi na ye nyonso, na ntango wana nde Nzambe apesaki ye nguya ya kokóma mwana mokonzi. Bomoni?

280 Ntango Polo abungisaki mayele na ye ya kelasi ná likindo na ye nyonso, Nzambe akómisaki ye ntoma mpo na Mabota.

281 Ntango Mose abungisaki makoki na ye nyonso mpe akómaki na bolembu, Nzambe apesaki ye nguya mpe atindaki ye na Ezipito ná nguya ya Molimo, na mibu ntuku mwambe; ná mandefu ekitá, mwasi na ye likoló na mbalata-mpunda ná mwana na loketo, mpe lingenda na loboko, akendeki mpe alongaki Ezipito. Iyo. Bomoni? Azalaki na mampinga nsima na ye te, ndenge alingáká kokende, kasi na nguya ya Molimo. Amen!

Na ntango ozali na bolembu, ntango wana nde ozali makasi.

282 Azalaki kotambola na nzela wana, abetaki-betaki monoko te, atatabanaki te, asalaki eloko moko te, akendeki sémbá kino liboso ya Akaba, mpe alobaki: “Nazali na Liloba na Nkolo.”

Alobaki: “Yo moto ozali kotia mobulu na Yisraele.”

283 Alobaki: “Yo nde moto ozali kotia mobulu na Yisraele.” Iyo, misie. Oh, ndeko! Iyo, misie. “Béngá banganganzambe ya mayele oyo ozali na bango awa, mpe tótala nani azali Nzambe.” Yango wana mpenza. “Tómata na Ngomba Karmel, tika ete Nzambe oyo ayanolaki na Pantekote áyanola lisusu. Tótala soki Nzambe azali bobele Nzambe yango moko, soki Yesu azali motindo moko lobi, lelo mpe libela.” Akitaki longwa na ngomba, azalaki na Nsango moko. Iyo. Nzokande liboso na yango, azalaki na bolembu mingi, abungisaki nyonso liboso ya kosala yango. Asengelaki kozala na bolembu liboso ákóma makasi.

284 Bopète ya Nsango Malamú nde ebetisaka bato libaku. Balukaka kokómisa Yango eloko moko ya mayele ya bongo, na ntango oyo yango ezali nde bopète. Kasi Nzambe azuaka mpenza bisalelo ya komikitisa, ná bolembu ná bopète, mpo na kosala misala na Ye ná yango. Ezali bobele esalelo na loboko ya Nzambe.

285 Yoane Mobatishi, moto-oyo-ayaki-liboso na Klisto, Nsango na ye ezalaki na komikitisa mpenza na lolenge ete Elekaki likoló na mitó ya bato. Bóyoka naino miniti moko. (Nazolikya ete nazoúmisa bino ntango molai te, bino baoyo botelemi elongo na bitutu, bomoni.) Bótala! Yoane, ntango. . . Basakoli nyonso batátolaki mpo na boyei ya Masiya. Moko na bango alobaki ete “Bangomba ekopumbwa lokola bana mpate mibali.” Bamosusu balobaki: “Nkásá ekobeta maboko.” Moko alobaki: “Mabwakú nyonso ekomatisama, mpe bangomba ekokitisama.” Oh! la la! Mokolo nini oyo!

286 Bosílá kokanisa Eteyelo ya Basakoli ná makanisi ya bato ya mayele mpo na yango? Oh la la! babóngisaki makambo nyonso na ndenge ya motindo mpenza! Kasi ntango ekokisamaki, uta na lisobe, mobange motei moko abimaki, oyo atángaki kelasi ata moke te na bomoi na ye, ntango mosusu gramere na ye ezalaki mabe mpenza. Tata na ye azalaki nganganzambe, kasi Nzambe amemáki ye mosika na yango. (Toyékolaki yango na liteya ya Lomingo eleki.) Aboyaki kotika ete ásangana na ba-denominations wana, mpe Amemaki ye na lisobe mpo Ye moko álakisa ye. Bato ya ndenge—bato ya lolenge wana nde bakangamaka na Liloba na Nzambe.

287 Abimaki na lisobe, pene na mibu ntuku misato; nabanzi mandefu ya moindo ezingaki elongi na ye, elíngámá-língámá; amizingaki na eteni monene ya mposo ya mpate; atelemaki na kati ya potopoto, kino na mabólongo na ye; alobaki: “Ngai nazali ye oyo mosakoli Yisaya alobelaki.” Mpe bato ya ba-denominations bayaki wana; alobaki: “Bókanisa te mpo na komilobela: ‘Tozali na oyo ná wana,’ Nzambe azali na makoki ya kotelemisa, longwa na mabanga oyo, bana mpo na Abraham!” Oh! la la! Mpo na nini? Azalaki na YANGO ELOBI NKOLO! Azalaki na Nsango. Nzambe alobaki liboso ete ye akoya. Mpe ntina. . . Esalemaki na komikitisa mpenza, Elekaki likoló ya mitó na bango.

288 Ntango Yesu ayaki, Alobaki: “Bokendeki kotala nini, molobeli ya mayele mingi oyo bakoki kobongwana longwa na Metodiste kino na Batiste, mpe longwa na Batiste kino na Presbiterien, kolongwa na Presbiterien kino na Pantekotiste, mpe longwa na Pantekotiste kino na eloko mosusu? Bokendeki nde kotala mokékélé moningisami na mopepe nyonso? Yoane te!” Alobaki: “Bokendeki nde kotala moto oyo alati bilamba ya kitoko?” Alobaki: “Lolenge ya batei wana bazalaka na bandako ya bakonzi.” Alobaki: “Bokendeki kotala nini, mosakoli?” Alobaki: “Koleka mosakoli!”

289 Yoane azalaki koleka mosakoli. Mpe, bótala, ayaki na komikitisa mingi, koleka bango nyonso. Kasi azalaki koleka mosakoli. Boyebi eloko nini Yoane azalaki? Azalaki motindami ya kondimana. Ya solo, azalaki yango. Akendeki mosika koleka mosakoli. *Mosakoli* azali momóni oyo amonaka makambo. Yoane

mpe asalaki yango, kasi ye azalaki mosika koleka oyo wana. Azalaki motindami ya kondimana. Alobaki: “Iyo, ye nde oyo balobelaki ete ‘Nakotinda motindami na Ngai liboso na elongi na Yo.’” Yango nde oyo ezalaki, azalaki motindami ya kondimana. Ya solo. Lolenge ya koya na ye na komikitisa, ezipaki miso ya bato na mayele.

²⁹⁰ Sikawa tosengeli kosilisa kala mingi te, na miníti moke mosusu, nazali na mwa makambo awa oyo nalingi koloba, biteni ya Makomi ná makambo mosusu oyo nakomaki.

²⁹¹ Tóloba nini mpo na mwasi-akufelá-mobali oyo azalaki na mwa faríni? Akómaki na bolembu mpenza, ntango mosusu akomaki kokufa na nzala. Azalaki na faríni te. Akokaki kokende esika mosusu te mpo na kodéfa faríni, moto mosusu te azalaki na yango. Kasi akómaki esika moko oyo, azalaki mondimi monene, mobali na ye azaláká moto monene ya Nzambe. Kasi akufelaki mobali, azalaki na mwana moko. Mpe atikalaki bobele na mwa eboke moke ya faríni, kasi ekokaki, yango nde nyonso oyo asengelaki na yango; epesamaki na maboko ya Nzambe, abikaki na yango mibu misato ná sanza motoba, na mwa faríni moke mpenza. Akómaki na bolembu.

²⁹² Abimaki na ntongo wana mpo na kolokota nkoni mibale, kobuka yango mpe kotia yango esika moko. Bomoni, nkoni mibale yango ezali Ekulusu. Bomoni? Kobuka... Alobaki: “Nakolokota nkoni mibale.” Atikálá koloba te: “Nakolokota nkoni ebele,” kasi, bobele nkoni mibale. Ezali bongo. Bomoni elílingí?

²⁹³ Mpe, iyo, lolenge ya kala mpenza... Ndenge bapelisaka móto sikawa, ezali kozua nkóni, kokutanisa yango mpe kopelisa na katikati. Ntango nakendaka kosala moláko, ngai... na bangomba, na butu, mpo nálénga na malili te, natiaka lonkoni moko *boye* mpe lonkoni mosusu *boye*, mpe na butu, nakobaka kopusa bansuka na yango, mpe ezikisaka yango ndenge wana, wana ozali kupusa yango, bomoni, esika esalaka ekulusu.

²⁹⁴ “Nazali na nkoni mibale. Nakolámba lípa, nakolámba faríni yango, mwa faríni moke oyo, mpe nakosala gateau mpo na ngai ná mwana na ngai. Tokolia yango mpe tokokufa.” Akómaki mpenza na bolembu, boye te? Alobaki... Abalukaki mpe abandaki kozonga. Oh, ezalaki ntongo ya moi makasi! Oh, elekaki ntango molai mingi, oyo ezalaki na eloko moko te. Nyonso... Mai te, mpe bato bazalaki kogánga, bato bazalaki kokufa, bisika nyonso; esika ya kodéfa ezalaki te, eloko ya kosala ezalaki te. Akómaki na nsuka ya nzela. Akómaki na ye na bolembu. Alobaki: “Nakolámba yango mpo na ngai ná mwana na ngai, na nsima tokolia mpe tokokufa.” Bongo abalukaki mpe alobaki... .

²⁹⁵ “Zela naino!” Atalaki na nsima. Mpe elongi ya mobange moko ná nsuki elíngámá ekotaki na ekuke ya lopango, alobaki:

“Kende liboso kolámbela ngai mwa gateau, mpe memela ngai yango.” Oh! “Yélá ngai mwa mai na loboko na yo, ná eteni ya lípa, mpamba te, YANGO ELOBI NKOLO!” Oh! la la! oyo wana nde esukisaki likambo. Oh! la la! Mwa moke oyo azalaki na yango, bomoni, abulisaki yango epai ya Nzambe. Ekokaki mpo na koleisa ye na ntango oyo etikalaki. Iyo. Bomoni, ntango azalaki na bolembu, ntango wana nde akómaki makasi.

²⁹⁶ Mosusu atikalaki bobele na mwa mafuta na mbeki. Mpe azalaki na eloko moko te, bana na ye mibale ya mibali balingaki kotekama lokola baombo. Azalaki na eloko mosusu te ya kosala ná mwa mbeki ya mafuta oyo. Ezalaki mingi mpenza te, akómaki na nsuka.

Eliya alobaki na ye, alobaki: “Ozali na eloko nini na ndako na yo?”

Alobaki: “Bobeles mwa mafuta na mbeki.”

Alobaki: “Kende epai na bazalani na yo kodefá bambeki mingi.”

²⁹⁷ Wana, bótala, komilengeláká liboso kutu likambo ésalema. Hmm? Bomilengela! Dawidi ayokaki mongongo wana na katikati ya banzete mikemike ya báká. Eliya amonaki lipata ya moke lokola loboko, alobaki: “Nayoki lokito ya mvula makasi.” Soki Nzambe akokaki bobele kozua mwa bambeki ya polele! Ya solo.

Alobaki: “Tondisa yango na ndako mobimba.” Amen!

²⁹⁸ Bomoni eloko nini Nzambe alingaka? Nzambe asengeli kozala na bambeki ya polele. Boyoka! Tozuá malakisi mingi mpenza, makambo ya bolémá mingi ya mangomba mpenza, kino tokomi na nsuka ya mbeki ya monene. Etikali bobele eloko moko, kozongela Nzambe ná Liloba na Ye. Mpe soki bosali yango, bózua bambeki ya polele. Bóbimisa bo-Methodiste nyonso libanda na yango, bo-Pantekotiste nyonso libanda na yango, mpe bo-Batiste nyonso libanda na yango, bótika yango kozala bobele bambeki, mpe bótia yango na kati ya ndako. Na nsima bótóka longwa na Mbeki oyo mpe bóbanda kosopa, amen, bóbanda kaka kosopa.

²⁹⁹ Azuaki oyo esengelaki mpo na kosungama na ye ná bana na ye, ná makambo nyonso mosusu, mpe afutaki banyongo nyonso. Mpo na nini? Mpo na nini? Mwa moke oyo azalaki na yango, apesaki yango na maboko na Nzambe, mpe atosaki maloba ya mosakoli oyo, asukaki malamu.

³⁰⁰ E Nzambe, tindela biso mosakoli oyo akozua Liloba na Nzambe, oyo akozua mwa *eloko mosusu* te, bobele kozua bambeki ya polele. Soki Nzambe akoki kozua kaka bambeki ya polele, na nsima kozua Liloba na Nzambe mpo na kosopa Yango na kati na moto yango.

³⁰¹ Ezali te baoyo balobaka: “Oh, naléngaki ntango nazuaki Yango. Nalobaki minoko ya sika ntango nazuaki Yango. Nabinaki na Molimo.” Bóbosana yango, bomoni, bóbosana yango!

³⁰² Bozela kaka wana kino Ekoya, esili, kino mbeki ekotóna. Ezali yango. Lolenge wana nde basalaka yango. Iyo, misie, bopete na Yango! “Bambeki etóndisamaki,” tokoki mpenza kouwela wana!

³⁰³ Mokolo moko, bayekoli bamitungisaki mingi, Yesu alobaki na bango, alobaki: “Bato nkóto mitano bazali awa,” mpe Alobaki, “bazali kokweya sénza, bazali na nzala.” Oh, nakokaki kouwela lisusu wana ngonga mobimba. “Bato nkóto mitano bazalaki na nzala,” ezali na bato milió mokama oyo bazali na nzala!

Balobaki: “Zóngisa bango na bandako.”

Alobaki: “Ntina ya kosala bongo ezali te.” Alobaki: “Bino bóleisa bango.”

³⁰⁴ Oh la la! Nakoki kobanza ndenge bazalaki kokongola biloko nyonso oyo bakokaki komona, mpe boyebi, ntango bakongolaki nyonso (biloko nyonso) oyo . . . Bólimbisa liloba oyo, “kokongola.” Kasi ntango bazuaki biloko nyonso, balobaki: “Sikawa, tala, toluki na moláko mobimba. Tozui ata loméyá moko te, na bongo tokoki kosala campagne te.” Bomoni? “Na bongo, tozali na nyonso awa, kasi eloko bobele moko oyo tozui, ezali bobele mwa mápa mitano ná mwa mbisi mibale oyo euti na mwana moke moko” lokola Dawidi, oyo autaki kuna na lisobe. “Yango nde nyonso oyo tozali na yango. Yango nde nyonso tozui. Tosuki wana. Tokoki lisusu kosala eloko mosusu te, Yoane.” Petelo alobaki: “Yango nde nyonso oyo tokoki kosala. Yango nde nyonso oyo tokoki kosala. Tokomi na nsuka ya mayele na biso. Yango nde bobele eloko ya kolia oyo tozali na yango.”

³⁰⁵ Ee, nakoki kozua bobele Likomi moko ya moke, Misala 2:38, mpe yango nde nyonso oyo tosengeli na yango, kaka kotosa Yango. Bozali na ntina ya kotánga na ba-seminaire te, ya kosala *boye* na *boye* to *boye*, bózua bobele Yango. Iyo, bózua bobele—bobele Yango, yango nde nyonso oyo bosengeli na yango: “Bóbongola mitema, moko na moko na bino, mpe bózua libatisi na Nkombo na Yesu Klisto mpo na bolimbisi ya masumu na bino, mpe bokotondisama na Mafuta.” Bomoni? Bótikala mpenza polele, bómíngela mpo na Oyo wana, yango nde nyonso oyo bosengeli na yango. Bótia bobele litangá moko kati na yango, mpe bótala yango kotóndisama.

³⁰⁶ Boyebi, ezalaki mpenza ya kokoka te na kati ya mbeki wana mpo na kotangisa litangá nakati ya moko na moko. Ntango mosusu atiaki mosapi na ye, *boye*, mpe atangisaki yango na kati ya moko na moko ndenge wana; atalaki nsima mpe

etondaki. Atangisaki yango, bomoni, yango nde nyonso oyo asengeli kosala, mpo ezalaki mafuta oyo epambolami.

307 Kozua kobikela makambo ya seminaire moko boye te. Zua Liloba na Nzambe mpe tangisa Yango na kati, okomona ndenge ekotonda.

308 Alobaki: “Ee, tosengeli kotangisa litangá ya ndenge nini? Ntango mosusu tokoki kozua eloko moko na Nzembo.”

309 Bózua oyo nayebisi bino: “Bóbongola mitema, mpe bózua libatisi na Nkombo na Yesu Klisto mpo na bolimbisi ya masumu, mpe bokotondisama uta na Litangá yango.” Tangisa yango kuna na kati, mpe okotondisama uta na Litangá yango. Yango nde Litangá oyo Petelo asalelaki na Mokolo ya Pantekote. Yango nde Litangá oyo Polo asalelaki. Yango nde Litangá oyo bayekoli nyonso basalelaki. Oyo etikali ekobakisama, yo zua bobele Litangá wana mpe landa yango kino na nsuka, mpe oyo etikali ekozala malamuu.

310 Kómá na bolembu! Kómá polele! Tikálá mpenza polele, mpe kobanda wana, ekokóba kotanga, mpe Nzambe akokóba kotangisa oyo etikali. Yo sálá bobele bongo. Yo bétá mabólongo na nsé mpe yambá yango na motema mobimba. Kotisa na motema na yo sikawa mpe lobá: “Nzambe, nandimi Yango, na motema mobimba!” Nzambe akotala likambo ya matangá oyo etikali, ekotondisama: “Okotondisama lisus-...okotondisama na Molimo Mosanto.”

311 Boye, bazalaki na mwa mápa mitano ná mbisi mibale. Boye balingaki kosala nini? Boye babelemaki mpe balobaki: “Oyo nde nyonso oyo tokoki kokongola. Mayele esili biso. Tozokoka kozua eteni mosusu ya lipa esika moko te, moto moko te azali. Mpe mwana mobali oyo, ntango mosusu, lokola etaliseli . . . akimaki kelasi, akendeki kelasi na ntongo oyo, mpe akimaki kelasi mpo na kokende kolóba mbisi kuna. Bongo tozuaki ye kuna pene na mai, ayaki koyoka. Mpe, kuna, azali na yango mitano.” Matondi na Nzambe mpo na mwana mobali yango! Iyo, misie. Balobaki: “Biso . . . eloko bobele moko oyo tozali na yango mpo na kobikela ezali mwa litangá oyo.” Balobaki . . .

312 Yesu alobaki: “Ekoki na yango. Bóyá na yango awa.” Bomoni? “Bóyá na yango awa, bópesa Ngai yango. Bopesa Ngai mwa litangá yango, Nakotala oyo etikali. Sikawa, bino bókoba bobele kokabola, wana Ngai nazali kopesa bino uta na litanga oyo.”

313 Mpe moko na moko na bino ázua litanga ya Misala 2:38 na ntongo ya lelo, na motema, mpe kobanda kaka wana, okomona ndenge Akobanda kobuka Lípa ya Bomoi epai na yo. Yo bóngóla motema, zuá libatisi na Nkombo na Yesu Klisto mpo na bolimbisi ya masumu na yo, na bongo okomona soki Molimo Mosanto akotanga te na kati, akokoba kotanga likoló na oyo mpe kotanga

likoló na oyo *wana*, kotanga *awa*, kotanga *kuna* mpe kotanga *kuna*, mpe kotondisama ya Molimo Mosanto ekosalema! Ya solo!

314 Ozali na ntina te ya kokende na ba-seminaire. Ozali na ntina te ya kozala mayele. Eloko bobele moko oyo osengeli kosala ezali kosósola ete oyebi eloko te. Tika ete Nzambe ásimba yo, Akotala makambo oyo etikali.

315 Malamu, na nsima Mongongo elobaki: “Bóyá na yango awa.” Yango nde Nzambe alingi na ntongo oyo: komemela Ye eboke ya bambeki ya polele. Ye akotala makambo oyo etikali. Iyo, misie.

316 Mokufi miso Bartimé afandaki pembeni na ekuke, ná bilamba epasúká, na malili, oh, na ntango na ye ya bolembu koleka, nde ayokaki Mongongo moko koloba: “Bóyá na ye awa.” Ya solo, mbala mosusu ezali ntango na yo ya bolembu koleka.

317 Maria azalaki na nkunda, motema ebukani, babomaki Bebé na ye, Mwana na ye ya mobali, nyonso, elikia nyonso esilaki. Mpe akendeki kopakola Ye malási mpo Ápola te, kasi nzoto na Ye ezalaki kuna te. Mpe ayokaki Mongongo moko koloba: “Mwasi, ozali kolela mpo na nini?”

318 Alobaki: “Basili komema Nkolo na ngai. Mpe ngai. . .” Mawa mingi mpenza, oyo bautaki koyokisa nsoni, ezalaki Mwana na ye; balongolaki Ye bilamba nyonso, batiaki Ye kuna na Ekulusu, babákaki Ye na ekulusu mpe babétaki Ye nsété, nsima na Ye kotatola ete Azalaki Masiya, wana ye ayebaki ete Molimo Mosanto nde azipaki ye mpo na kobota Mwana yango. Azalaki Mwana na Nzambe. Asiláká komona misala na Ye, ná makambo nyonso, mpe amonaki na ntango ya bolembu koleka. . .

319 Mpe kuna, Yesu azaláká kotelemela mabe, kotelemela bibongiseli wana, kotelemela Bafalisai wana; akómaki na bolembu, mpe amikabaki Ye moko kino na kufa mpe akufaki lokola mosumuki na Ekulusu, komemáká masumu na biso. Banzembo mpenza, basakoli mpenza oyo bango bandimelaki, basilaki kosakola (mibu nkama na nkama liboso) Maloba mpenza oyo Alobaki na Kalvari, kasi bazangaki komona yango. Bato minene ya lingo- . . .

320 “Nzambe na ngai,” Dawidi alobaki, “Nzambe na ngai, mpo na nini Otiki ngai?” Nzembo 22, “Mikuwa na ngai nyonso, ezali kotalatala ngai, ata moko na yango ebukani te. Bangingisaki mito mpe balobaki: ‘Atiaki elikya na bamosusu. . . A—Abikisaki bamosusu, Ye moko Akoki komibikisa te.’” Ná makambo nyonso oyo basakoli basiláki koloba, ezalaki mpenza wana! Mpe Yesu, azokufa, akangami na Liloba yango, mpe amikabaki Ye moko. Nzambe, Emanuele, akómaki na bolembu mingi na lolenge ete Amikabaki Ye moko na kufa, mpe na nkunda, mpe molimo na Ye na ewelo. Bolembu! Kasi longwa na komipesa mobimba wana. . . Asekwaki na ntongo ya Pasika, Amilukelaki nzela longwa na nse koleka.

³²¹ Azalaki Oyo-aleki-Likolo, mpe Akómaki oyo-ya-nsé-koleka. Ayaki epai na bato ya nsé koleka, Akendeki na engumba ya nsé koleka. Mpe moto ya mokuse koleka na engumba asengelaki kokitisa miso mpo na kotala Ye. Alongwaki wana kino na kufa, mpe longwa na kufa kino na nkunda, mpe longwa na nkunda kino na ewelo; kino na esika ya nsé koleka nyonso, na ewelo ya nsé koleka nyonso oyo moto akokaki kokanisa, Akitaki kino kuna.

³²² Kasi bongo, kolongwa wana, Nzambe abandi kotómbola Ye. Koleka na Paradizo, kolongwa kuna kino na—kino na nkunda, mpe kolongwa na nkunda kino na Nkemo, mpe na Likoló mpenza na lolenge ete Asengeli kokitisa miso mpo na komona Lola. Anetolaki bangwende na Ye na Lola!

³²³ Mwa mama yango ná motema mobukani, ayebaki yango te, atelemaki wana: “Bamemi Nkolo na ngai, mpe nayebi esika yango te.” Azalaki. . . ngonga na ye ya bolembu koleka nyonso. Nkolo na—na ye azalaki lisusu te. Bautaki kobáká Ye na ekulusu, ata Ye atikaki yango. . . babakaki Ye na ekulusu, na nsoni, batombolaki Ye kuna likoló, bolumbu, na miso ya bato wana; mpe batobolaki Ye mopanga na mopanzi, ná makila kotanga, mpe ye ayokaki ndenge Azalaki kogánga na Ekulusu, mpe amonaki mabelé koningana, mpe likoló nyonso eyebaki ete Akufaki. Bakitisaki Ye, nzoto ekangámá mpe malili, mpe batiaki Ye na nkunda. Amilobelaki: “Limemia ya nsuka oyo nakoki kopesa na Mwana na ngai molingami ezali ete náya kopakola Ye malási mpo Ápola te, kasi sikawa bakei na Ye.” Atelemaki wana koleláká, mwa mama yango atelemaki wana mpe azalaki kolela, kotangisáká mpisoli. Oh, ezalaki ntango ya bolembu koleka!

“Ozali kolela mpo na nini, mwasi?” Mongongo moko elobaki nsima na ye.

³²⁴ Akanisaki ete ezalaki sinzili ya nkunda, alobaki: “Oh, bamemi. . .” Akokaki ata kobaluka te, alembaki mingi. Alobaki: “Nalali te mikolo misato nyonso oyo, butu na moi. Nazalaki wana mpe namonaki ndenge bazalaki kobáka Ye na ekulusu, namonaki Molingami na ngai moko oyo nayebi ete Azalaki Mwana na Nzambe. Nayebi ete Azalaki yango! Kasi bango. . .” (Azalaki kotala ngámbo mosusu, mpe Ye na nsima.) “Bamemaki Ye mpe babákaki Ye na ekulusu. Namonaki Ye kosekwisa bakufi longwa na nkunda. Namonaki Ye kosala bikamwa na bikamwa. Mpe nayebi ete Molimo Mosanto. . . Nzambe ayebi motema na ngai, nayebaki likambo moko te, Molimo Mosanto nde apesaki ngai Mwana yango kozanga koyeba mobali. Nayebi mpenza ete ezalaki solo! Namonaki ndenge bayokisaki Ye nsoni mpe. . . balongolaki bilamba na Ye, batómbolaki Ye likoló mpe batikaki Ye bolumbu. Akufaki liwa ya sómo koleka. Nalingi Ye, etali ngai te oyo basalaki Ye. Nalingi kaka kokunda Ye, nalingi—nalingi kokunda Ye na lolenge malamau oyo esengeli, kasi bamemi Ye. Nalekisi mikolo mingi mpenza, motema na ngai ezokisami.

Nazali bobele boye. Nayebi te eloko nini basali na Nkolo na ngai.”

325 Alobaki: “Maria.” Na nsima akómaki na makasi. Amen! “Kende koyebisa bayekoli na Ngai ete Nakokutana na bango na Galilai.” Oh la la!

326 Na kati na bolembu nde topesamaka makasi. Ntango ozali na bolembu, na ntango yango nde okómaka makasi.

327 Petelo, wana azalaki kolóbo mbisi, azalaki. . . mosala na ye ezalaki ya kolóbo mbisi. Nasepelaka na lolenge ya mosala na ye. Bongo, azalaki kolóbo mbisi kuna, alembaki nzoto, ayebaki ete asilaki kowángana Klisto. Oh la la! Ayokaki Mosakoli yango kotelema kuna mpe koloba na ye: “Petelo, olobi ete olingaka Ngai?”

328 Alobaki: “E Nkolo, Oyebi ete nalingaka Yo.” Alobaki: “Nalingaka Yo. Nakoki ata kokufa mpo na Yo.”

329 Alobaki: “Petelo, okanisi ete euti na motema mpenza, kasi okowángana Ngai mbala misato liboso. . . Okowángana Ngai liboso sósó mobali élela mbala ya misato. Omoni, okowángana Ngai mbala misato liboso sósó élela.”

330 Bongo ntango amonaki likambo yango kokokisama, ntango atelemaki wana mpe alobaki: “Nayebi Ye te. Te, nayebi eloko moko te na ntina na ba-Pantekotiste wana.”

331 Ezali ntango ya kosilisa liteya te, sáá na ngai nde ezali kobetabeta. [Ngonga ya saa ya Ndeko Branham ebetaki—Mok.] Bomoni? Alobaki ete: “Na—nayebi. . .” Na—nasengeli kosilisa sikawa, kasi na—nakoki kosilisa sika-sikawa te, bomoni, na bongo nasengeli kosilisa yango awa kaka na miníti moke.

332 Alobaki: “Na—na—na—na—nayebi ete nawáanganaki Ye. Nawáanganaki Ye liboso na Pilate. Nawáanganaki Ye liboso na mwasi oyo abelemaki na ngai mpe alobaki: ‘Yo ozali moko na bango te?’ ‘Te!’ Mpe natukáki kutu!’ Oh, ye azalaki komitungisa mpenza. Alobaki: “Na—na—na. . .” Ye awáanganaki. . . Petelo awáanganaki Ye. Mpe amonaki Yesu kotelema mpe kotala, na ntango yango nde sósó elelákí, abwakaki miso na ngambo ya Petelo. Abimaki. Oh, alembaki nzoto mpenza, alobaki: “Mpo na nini nákoba kozala na bomoi?”

333 Na bongo, longola wana, alobaki: “Nakanisi ete nakozonga mpo nákende kolóbo mbisi. Nakoki lisusu koteya te, na bongo nakozongela kolóbo mbisi.” Autaki kobwaka monyama na mai mpe asalaki yango butu mobimba, azuaki ata mbisi moko te. Mpe akómaki na ntango ya bolembu, azuaki eloko moko te, amilembelaki nzoto, akómaki na nsuka ya makoki na ye.

334 Ee, akanisaki ete azalaki moto monene, akataki litoi ya mwana ya nganganzambe mokonzi ndenge wana. Ee, akanisaki ete azalaki moto monene, boyebi, ayekolaká eloko moko. Kasi

ayebaki eloko moko te! Asengelaki kobosana nyonso na ntina na yango.

³³⁵ Mpe azalaki wana, alobaki: “Ee, nayebi eloko moko, nazali molóbi mbisi. Nakoki kokoba komilukela, kolóbo mbisi.” Autaki kobwaka monyama butu mobimba kasi azuaki eloko moko te. Oh, oyo kolemba nzoto solo! Ntango nyonso azalaki kobenda yango, monyama ezalaki na eloko te. Mpe alembaki nzoto mpenza! Akómaki na esika ya bolembu koleka, alobaki: “Nakoki ata koyoka mposa ya komibwaka libanda na masuwa oyo. Nazali na nagi eloko te, ata bongo.”

Alobaki: “Bana, bozali na mbisi?”

³³⁶ Abwakaki miso na libongo, mpe moto moko atelemaki wana. Alobaki: “Te, tosali mosala makasi butu mobimba kasi tozui eloko moko te. Nakanisaki ete nazalaki molóbi mbisi.”

“Ezali nde yo, Simona?”

³³⁷ “Iyo. Ee, nasali mosala makasi butu mobimba kasi nazui eloko moko te. Oh, na—na . . . Tozali ata na mbisi moko te awa.”

Alobaki: “Ee, bwaka monyama na yo na ngámbo mosusu.”

³³⁸ “Tosilaki . . . Nini?” Bongo, aband- . . . Alobaki: “Na ngámbo mosusu? Tobwakaki yango mbala na mbala!”

“Bwaka yango na ngámbo mosusu.”

³³⁹ Abwakaki monyama na ye, mpe abéndaki. Alobaki . . . Bongo akómaki makasi. Oh! la la! Alokotaki noki monkoto na ye ya molóbi mbisi mpe alátáki yango, alobaki: “Bandeko, wana Ezali nde Ye!” Mpe akómaki na libóngó liboso na bango nyonso, liboso bákoka kolúka bwato na bango na lombangu nyonso, abetaki mai mpe alekaki bango, ná monkoto na ye ya molóbi mbisi, akómaki na libongo. Mpo na nini? Ntango azalaki makasi. Ntango azalaki makasi, akokaki kosala eloko moko te, kasi ntango akómaki na bolembu, na ntango wana nde akómaki makasi. Iyo, misie.

³⁴⁰ Oh, lolenge ya kosala ya Nzambe ezali, kozua bato oyo bazali bambeki ya polele mpo na koningisa mokili ná bango. (Sikawa, mwa moke kaka mpe tokokende.) Lokola na Pantekote, na Pantekote, Asalaki nini? Esengaki bango mikolo zomi mpo na kobimisa nyonso oyo ezalaki kati na bango. Kasi bango nyonso bazalaki wana, ná bambeki na bango etála likoló, mpe Nzambe Amizuaki mpe atondisaki bango. Esili! Bangingisaki mokili; Amisopaki kati na bango.

³⁴¹ Yango nde bosenga ya lelo. Yango nde tosengeli na yango lelo: bambeki ya polele, iyo, misie, mpo Nzambe ákoka kotondisa bango. Mpe okoki kozua bango te. . . Nasengeli kotika makambo mingi awa. Nzambe akoki kosalela bango te wana basili kotondisama. Soki otóndá na mayele ya likindo, Nzambe akoki kosalela yo te. Nzambe asengeli kozua bambeki ya polele mpo Ye ákoka kotondisa bango.

³⁴² Sikawa, Eliya alobaki te ete: “Kende kozua mwa bambeki mpe défá mafuta mingi, bongo tokotala soki tokokoka te koteka yango na ntalo malamú, okozua mwa moke koleka mpo ókoka kofuta nyonso ya mozalani na yo ndenge wana.” Alobaki: “Zua bobele bambeki ya *polele*. Yango nde nyonso oyo osengeli na yango.”

³⁴³ Yango nde likambo oyo ezalaki na Pantekote, bazalaki na bambeki ya *polele* mpo Nzambe ákoka kotondisa yango. Ndeko, Lelo oyo esengeli na yango. Lelo oyo; tosengeli kozala na yango. Tó tokozala na yango, tó tokokufa. Nalingi kosilisa sikawa, bóyoka. Tosengeli kozala na yango tó tokokufa. Iyo, misie.

³⁴⁴ Ba-masíni minene ya mangomba oyo tozali na yango, ba-masíni minene ya mangomba esili kotonda salite ya carbon, esili kozua ebótú ya molimo kati na yango. Ndeko Collins azali na esika moko awa, ná Ndeko Hickerson. Nabanzi ete vilebrequin nde ebebi. Eloko moko esili kobeba. Basalelaka essence ya mabe, etondi na carbon mpenza. Basalelaka makambo babikelaki na seminaire, na esika ya Molimo Mosanto.

³⁴⁵ Mayangani minene na biso ya kolamuka ya ekólo, bato minene na biso, mayangani na biso ya kobondela mpo na babeli, esili nyonso kokweya. Toyebi ete ezali bongo. Bótala evangeliste na biso ya lokumu, Billy Graham, akatisaki ekólo mobimba kokende kozonga, kokende kozonga, kokende kozonga. Epesi litómbe nini? Oral Roberts, mayangani ya kobondela mpo na babeli bisika nyonso, mpe ezali kokóba kobéba koleka ntango nyonso.

³⁴⁶ Mpo ezali nyonso ba-Batiste, ba-Presbiterien, ba-Assemblée de Dieu, bibongiseli nyonso mosusu oyo ya ndenge na ndenge, bazali kosangisa yango nyonso, ezali nini? Masíni monene ya mangomba, kasi Nzambe atondisi yango mpenza na carbone mpo na bino. Sikawa ekómi komela péma, “tshum,” pum, pum, pum, “tshum,” pum, pum, pum, mwa moke awa mpe kuna. Esili mpo na yango! Ekómi na nsuka! Essence esili nye, bosopaki mai na kati. Nyonso esili (iyo, misie), ba-pneus etoboki na ngámbo nyonso mibale. Tozali na lolenge moko ya sómó. Masini ya mangomba esili kotelema.

³⁴⁷ Mpe, ndeko, ezipelo ya lifelo esili kolongwa. Ya solo. Mpe maziba ya nguya ya milimo mabe ezali kosopana bipai nyonso. Esili kolónge bikólo. Esili kolónge polítiki na lolenge ete epolí kino na kati. Esili kolónge mangomba na lolenge ete bayebi eloko mosusu te bobele denomination.

Soki olobi: “Ozali Moklisto?”

“Nazali Metodiste.”

“Ozali Moklisto?”

“Nazali—nazali Pantekotiste.”

348 Ndenge nalobaki mokolo mosusu, elingi koloba eloko moko te, ná ndenge moko kozala ngulu, to ngulúbe, to mpunda, to eloko mosusu. Etali Yango ná likambo moko te. Bakómaka Moklisto ntango obótámi mbala mibale mpe otondisámi na Molimo Mosanto, liboso na yango te, mpe soki omipési mobimba na Molimo. Soki omipési na Molimo te, boye obotámi mbala ya mibale te mpe ozali na Molimo Mosanto te. Okoki koloba minoko na sika mpe kolénga, kopumbwa mpe kopota mbangu, mpe kosala makambo ndenge na ndenge ya . . .

349 Polo alobaki: “Nakoki kolongola ngomba na kondima, nakoki kobikisa babeli, nakoki kozala na boyebi ya Biblia, nakoki kokende na seminaire mpo na koyekola makambo nyonso oyo, mpe nyonso wana,” alobaki, “nazali bobele eloko mpamba!” Aleluya!

350 Oh la la! mofiníko ya mbilíka esili kolongwa mpenza! Milimo mabe kowayáká bipai na bipai, banguya ya zabolo, na nsé na nkombo ya Boklisto, “koteyáká lokola Malakisi mibeko ya bato,” malakisi ya likindo ya seminaire, bazali kotika Biblia mpembeni.

351 Aleluya! Nani azali na makoki, nani azali na makasi mpenza, nani azali na bwanya mpenza? Nani azali na nguya mpenza mpo na kokonza limpinga ya milimo mabe oyo, ékolongoláká basi na biso bilamba, na nkombo ya batei, ba-Methodiste, ba-Batiste, mpe ata ba-Pantekotiste? Bazali kopakola-pakola bilongi na bango lokola Yezabele, kokata nsuki na bango, mpe kolata bapatalon lokola mibali mpenza. Batei na biso, bazangi mpenza makoki ya kotelema liboso na bango mpe koyebisa bango yango. Bakonzami na milimo mabe! Limpinga ya milimo mabe nde epasolisaki ye bilamba nyonso. Molimo mabe oyo ezali konguluma, ezali nani?

352 Nani azali na makasi mpenza? Denomination ya—ya lolenge nini ezali na makoki ya kolónge ye oyo azali komata kokita na bankunda oyo ya ba-denomination, kogánga: “Ntango ya bikamwa esili koleka, mpe tozali na bosenga ya Molimo Mosanto te”?

353 Nani akoki kokonza molimo mabe yango? Nzambe! Tokokoka kosala yango na nzela ya denomination te. Tokokoka kosala yango na makasi ya mangomba te. Kasi mokolo moko, ezalaki na Mongongo moko oyo esalaki yango, amen, ekonzaki milimo mabe yango, ezungisaki bango na lisosoli ya malamu mpe elatisaki bango bilamba. Mongongo yango moko epesaki biso elaka: “Misala mizali Ngai kosala, bino mpe bokosala yango.” Bokosaláká yango te na essence ya mangomba kati na motuka oyo ebébá na carbon. Bokosaláká yango te kati na ebongiseli. Bokosala yango ntango botikali polele mpe bokómi na bolembu, soki bobimisi nyonso oyo ezali na kati na bino, mpe botiki Molimo Mosanto ékota mpe éningisa binama na bino nyonso, mpe étondisa mofiníko nyonso ya nzoto na bino. Bobele

yango nde. . .kosala yango. Tozali na bosenga ya ebongiseli ya sika te.

³⁵⁴ Oyo tosengeli na yango, E Nzambe, nazali koyoka Yango kosopana zinga-zinga na awa sikawa. Oyo tosengeli na yango ezali mosakoli ya Nzambe, kotéléma ná konguluma ya nkake ya Nzambe, ná mikalikali ya molimo, oyo ekoningisa mokili oyo mpe koyokisa yango nsóni! Aleluya! Mbeki ya polele nde oyo Ye azali na yango bosenga, ya solo, Lingomba oyo ebengámi kobima, etóngá moke mpenza oyo ekoyamba nguya ná mapamboli ya Nzambe, ná Nsango na Ye. Aleluya! Yango nde tosengeli na yango.

³⁵⁵ Bókoma na bolembu mpo bókóma makasi. Ekolonga milimo mabe nyonso. Ekoyokisa bato ya mayele nsoni. Ekomema mibali ná basi oyo Nzambe asili kobénga, mpe bobele bango.

³⁵⁶ Bomikanisela: “Ndenge ezalaki na mikolo ya Noa, ekozala mpe bongo na boyei ya Mwana na moto, milimo mwambe ebikisamaki.” Na mikolo ya Eliya, bobele bato nkóto nsambo nde bazalaki na Yango. Oh, bókánisa naino esika nini tozali kobika sikawa. Ntango Yoane abandaki mosala, na ntembe te, lingomba moke yango ezalaki mpenza na bato moke, kasi ezalaki na bambeki ya polele, mpo na kosopa Mafuta kati na yango. Aleluya!

E Nzambe, tika ete tókóma polele, biso moko.

³⁵⁷ Bókoma polele, baninga. Bókóma na bolembu! Bóboya makoki na bino moko! Mpe bino baoyo bozali koyoka na radio. . .na radio te, kasi kuna na. . .baoyo bozali koyoka ba-bande oyo, na bisika nyonso oyo yango ekokóma, bómikomisa mpenza polele. Bómisopa mobimba likoló na etumbelo ya Nzambe lokola mbeka. Tika ete Mwanje áya ná likala ya Móto, átondisa mbeki yango na nguya ya Nzambe na-Nguya-nyonso. Bókóma. . .Bongo Akokómisa yo makasi, Akopesa yo ngolu mpo na kotelema ngwi.

Tógumba mitó miniti moke.

³⁵⁸ E Nkolo, ntongo ya Lomingo mosusu euti koleka, mpe tofandaki na eyanganelo malamu oyo, esika mibali ná basi oyo bayebi Yo, esika Molimo na Yo efandi na mitema na bango, bandimi Yo mpe basili kosala kokokana na Liloba moko na moko oyo O—oyo Osilaki kopesa biso mitindo ete tósala. Mpe totondi Yo mpo na bato oyo.

³⁵⁹ Mpe bato mosusu bakoki kozala kuna na mboka, bisika ba-bande oyo ekokende, bisika basi ná mibali ya komikitisa bakomema yango na bandako na bango mpe na mabótá na bango, kino na bamboka mosusu. Mpe tika ete báyoka, Nkolo, mpe básosola, bábimisa nyonso oyo ezali kati na bango mpo Molimo Mosanto ákoka kotondisa bango.

³⁶⁰ Bamosusu bakoki ata kozala awa na ntongo oyo, Nkolo, baoyo bako . . . oyo basili kobimisa nyonso oyo ezalaki kati na bango uta tobandaki koloba, baoyo basosoli ete batálelaki mingi koleka makanisi na bango moko, ya bango moko, bango . . . makoki na bango moko, batalelaki ma—mayele ya makanisi na bango moko ya bomoto, oyo ezali bobele mbindo liboso na Nzambe. E Nzambe, tika ete bábimisa nyonso oyo ezali kati na bango sikawa, bátosa na komikitisa mpe báya mpo na kotondisama na Molimo. Kokisa yango, Nkolo.

Ekomami na Biblia: “Baoyo nyonso bandimaki bazuaki libatisi.”

³⁶¹ Na kati ya ndako oyo, na ntongo oyo, Tata, elenge mwasi moko afandi awa, afandi awa na nsuka, nazali komikanisela ndenge Mme Hicks alandaki ngai awa na mpokwa moko, mpe atandamaki wana, atikalaki bobele mikuwa ya mpamba, misísá, loposo na ye ebendanaki, cancer esilaki kolia ya mobimba; mobali na ye akómaki naino Moklisto te. Mpe nazali komikanisela libondeli oyo nabondelaki na mpokwa wana: “E Nzambe, Yo nde otindaki elenge Dawidi ete álanda nkosi, bobele na mwa bilingóngo ya mpamba, mpe azongisaki mwana mpate yango.” Nalobaki: “Cancer oyo ekangi ndeko na ngai ya mwasi; ezali molimo mabe. Ngai nayebi ete Ozali Nzambe. Nasilá komóná Yo, Nkolo, mpe nayebi. Nasilá kosolola ná Yo, mpe Oyanólá ngai.” “Nalandi mpate ya Nzambe; cancer, tika ye!” Na nsima, napesaki ye motindo na Nkombo na Yesu Klisto ete “Zonga na ndako.” Mpe mobali na ye, oyo amipesaki naino te, andimaki Liloba yango mpe amemaki mwasi na ye na ndako. Ye oyo na ntongo oyo, mwasi monene na nzoto kolongono, cancer esilá nye, ayei na ntongo oyo mpo na kozua libatisi na Nkombo na Yesu Klisto. E Nzambe, totóndi Yo mpo na mbeki yango ya polele, oyo ebelemi mpo na kotondisama. E Nzambe, nabondeli ete Ópambola molimo yango.

³⁶² Nkolo, oyo wana ezali bobele ndakisa moko kati na mingi mosusu. Nabondeli ete mapamboli na Yo ézala likoló na eyanganelo oyo, na eyongi, e Nzambe, na eyongi. Soki . . .

³⁶³ Eloko bobele moko nde etikali, Tata, oyo nakoki komona, ezali, tó Ótelema esika moko ná bambeki ya polele mpo na koyokisa mokili oyo nsoni, to Ótinda Yesu nokinoki. Mpo tokómi na nsuka, Nkolo, makambo ya kosala etikali bobele mibale (mpe tosengeli komona yango mpenza sikawa) mpo toyebi ete ekómi na nsuka; tó tokomona likambo moko ya nguya kosalema mpenza sikawa, tó tokomona Boyei na Nkolo.

³⁶⁴ Masakoli nyonso ekokisami. Likambo ya nsuka, liboso Lingomba ésékwa, liboso Énétolama na Emoniseli mokapo ya 3, ezalaki boyei ya motindami moko na Eleko ya Lingomba ya Laodikia, oyo “akozongisa mitema ya bato epai na batata ya ebandeli,” akozongisa bango na Pantekote ya solosolo, oyo

balobaka ete bazali na yango. Ekozala na bato nkóto na nkóto mbala nkóto na nkoto, ndenge ezalaki na ntango ya Nowa, Nkolo, bakobunga. Mingi kati na bango bakobunga. Tozali komona yango kokokisama, Tata.

³⁶⁵ Yaka, Nkolo Yesu, nétola Lingomba na Yo. Mpe soki ezali mokano na Yo, Nkolo, liboso Lingomba yango énétolama, tika ete Nguya éfuluka. E Nzambe, tondisa bambeki oyo. Télémisa bango, Nkolo! Ningisa mokili oyo mbala moko lisusu! Toyebi ete ngonga ekosila koleka, kobongola motema ekozala lisusu te, ekokóma mosika mingi mpo na bango na ntango yango. Kasi talisa Nguya na Yo, Nkolo, tondisa bambeki yango mpe ningisa mokili oyo ndenge etikálá koningisama te liboso! Na nsima, nétola Lingomba na Yo. Tika mokili ná mobulu oyo emikotisi na yango, E Nzambe, bazali kobunda-bunda.

³⁶⁶ Bongo, toyebi ete, nsima na yango, Molimo Mosanto ya nkembo akokende epai na Bayuda na ntango wana. Ntango tomoni bankoto mokama na ntuku minei na minei likoló na Ngomba Sinai, batelemi elongo ná Mwana Mpate, kasi Mwasi na libala asíláki kokota na Lola. Asíláki konetolama, mpe Mwana-mpate asíláki kozóngá (Yosefe) mpo na komitalisa Ye moko na bandede na Ye. Mpe Biblia elobaki ete bokabwani ekosalema katikati na bango, ntango bakotala mpe bakomona Ye atelemei wana. Ntango Akomitalisa Ye moko, bakoloba: “Bilembo ya bampota oyo Ozui yango wapi?”

Alobaki: “Na ndako ya baninga na Ngai.”

Bongo bakoloba: “Ezali Ye oyo biso tobakaki na ekulusu.”

³⁶⁷ Mpe Akoloba lokola Yosefe: “Bómitungisa te, mpo Nzambe nde asalaki bongo mpo na kobikisa bomoi ya Mabota. Ezalaki fóti na bino te.” Bongo elobi ete bakokabwana, libota moko na mosusu, bakolela ndenge balelaka mwana na likinda oyo akufi na libota.

³⁶⁸ E Tata, mokolo yango ekómi pene, yango nde nsuka ya Mposo Ntuku Nsambo wana. Ete ntango ekómi pene, Nkolo.

³⁶⁹ E Nzambe, tika ete mongongo—mongongo ya basakoli ya solo ya Nzambe épamela mwasi yango ya mikolo oyo, lingomba oyo ya mikolo oyo, likindo oyo ya mangomba ya mikolo oyo.

³⁷⁰ Ningisa batei oyo bazobángaka koteya Solo. E Nzambe, kamátá bato yango mpe ningísa bango lokola esálémá naino te, sálá ete bamiyoka nsóni.

³⁷¹ Kasi toyebi likambo moko oyo, mpe tokoki kopema na elikya nyonso, ete: “Moto moko te akoya, soki Tata abendi ye te. Mpe baoyo nyonso Tata asilá kopésá bakoya.” Bakokóma mpenza esika Okáná ete bakokóma. Kasi Olobaki: “Bóbanga te, etonga moke, mpo Tata na bino asepeleli kopesa bino Bokonzi.” Toyebi ete Ezali solo. Okébisaki biso uta ebaneli ete bakozala mpenza, mpenza moke, baoyo bakomilengela, ntango ngonga yango

ekokoka. Na nsima, lisekwa monene ekosalema, mpe basíkolami nyonso oyo basíláki kosíkolama kati na bileko bakosekwa. Kasi na eleko ya nsuka oyo, na ntango ya nsuka mpenza, Lingomba ekozala mpenza na bato moke.

³⁷² Na bongo, tozali komona yango, Tata, tozali komona Nsango ya lelo. Tozali komona ndenge bazali koboya Yango, tozali komona bokabwani yango, tozali komona makambo nyonso oyo.

³⁷³ Tozali komona libota na Yo kotatola ete bazangi . . . ete bazali “mpamba.” Bakómi bobele na mposa ya kotondisama na Yo, Nkolo. Sikawa, nabondeli ete Óningisa mokili na nzela na bango, mwa mikolo moke mpenza, liboso na Boyei na Nkolo.

³⁷⁴ Sikawa, katikati na biso, babeli bazali, ezali na bato mosusu oyo basengeli na lobiko na nzoto. Tokotika bango te, Nkolo, mpamba te elobami: “Kobosana bolamu na Ye nyonso te: Ye oyo alímbisaka masumu na yo nyonso ya nko; mpe Abikisaka bokono na biso nyonso.” Tobondeli ete nguya na Ye monene ya kobikisa ézala likoló na moto nyonso oyo azali awa. Soki Okoki kobikisa molimo moko kuna, kozanga kokende kuna, bobele mpo motema na ye etalaki epai na Yo, koleka boni Okoki kobikisa nzoto!

³⁷⁵ Miswale etiami awa. Napamboli yango na Nkombo na Nkolo Yesu, ndenge ntoma monene Polo asalaki. Tika ete moto nyonso oyo akolata miswale yango ábikisama. Tika ete mabota oyo ekabwanaki ézonga na boyokani. Tika ete bana mike, oyo bazángá tata, bazángá mama, ná baoyo bakabwáná, tika ete libota yango ésangisama lisusu. Kokisa yango, Nkolo. Bikisa babeli nyonso sikawa, ná bato na mpasi, zua nkembo mpo na Yo moko.

³⁷⁶ Mpe, Nkolo, biso baoyo tozali komeka kotelemisa bambeki na biso, kotombola miso na biso, mitema na biso epai na Yo, toboi ata kondima ete tozali bato ya mokili oyo. Biblia elobi ete “Abraham atikaki ndako na ye, atikaki engumba na ye, mpo na kofanda na mboka ya elaka, azalaki kotatola ete azalaki ‘moto ya mokili oyo te’ kasi azalaki ‘moleki nzela mpe mopaya.’” Abraham, Isaka ná Yakobo, baoyo nyonso bazali kotatola ete “bazali ya mokili oyo te,” bazali bobele kotatola ete Engumba moko ezali, oyo Motongi mpe Mosali na Yango ezali Nzambe, mpe bazali kolanda nzela yango.

³⁷⁷ Tika ete mitema ébongwana sika-sikawa, wana nazali kobondela, Tata, mpe tika ete ézua lolenge ya malamumu. Mpe ntango mosala ya libatizi ekobanda, tika ete koningana makasi ézala katikati na bato, tika ete bato oyo bakanísaki yango naino te liboso, tika ete émonisamela bango. Mpe Olobaki ete bato nyonso oyo Osilá kobéngá, O—Okotinda bango.

³⁷⁸ Sikawa, natiki nyonso na maboko na Yo, Nkolo, ná mwa liteya oyo ebukana-bukana, oyo euti na mbeki moko ya mpamba, oyo ezali na eloko moko te kati na yango, Nkolo. Nabondeli ete Ókamata Maloba yango mpe Ónyangamwisa yango na kati

ya mitema ya bato, mpe tika ete bázanga makoki ya kotangwa mosika na Yango. Kokisa yango, Nkolo. Natiki yango na maboko na Yo sikawa, na Nkombo na Yesu Klisto. Amen.

[Ndeko moko apesi lisakoli—Mok.]

³⁷⁹ Wana bozali kozua mokano, bózua mokano. “Mpo na nini botelemi katikati na makanisi mibale?” Bosili koyoka oyo Ye alobaki. Soki Nzambe azali Nzambe, bósalela Ye; soki mokili nde nzambe, bokende liboso. Bomoni? Soki nzela ya denomination ezali malamumu, bókoba na yango; kasi soki Biblia ezali malamumu, na bongo bobélema na Yango. Bomoni? Bópona na ngonga oyo nani bokosalela.

³⁸⁰ Sikawa, kati na Molimo, tóyemba loyembo moko. Biblia elobi: “Bayembaki loyembo mpe babimaki.” Tóyemba loyembo ya kala oyo eyebáni mingi, *Nalingi Ye*, wana togumbi mitó ná mitema liboso na Ye.

Nalingi Ye,

Sikawa, zua mokano nini oyo okosala.

Nalingi Ye

Mpo Alingaki ngai liboso

Mpe Asombi lobiko na ngai

Na nzete ya Kalvari.

³⁸¹ [Ndeko Branham abandi koyemba na nse ya mongongo *Nalingi Ye*—Mok.] Okoki kozua mokano mpo na Klisto? Ezali mpenza mokano te, bimisa nyonso oyo ezali kati na yo: “Nkolo, nazali malamumu te. Kati na ngai, eloko ya malamumu ezali te. Tika ete nábosana nyonso oyo nasílá koyeba. Sikawa yáká, Nkolo Yesu, kotika te ete éleka likoló na motó na ngai. Tika ete náyamba Yango mpe nátondisama na Molimo na Yo, Nkolo. Kobanda lelo, tika ete náková mobimba wa Yo.” Sikawa bódela, libondeli ya mokuse epai na Nzambe; libondeli oyo ya pete, bana, bino nyonso.

Yo Mwana-mpate ya Kalvari,

Nzambe Mobikisi;

Yambola na motema na yo.

. . .yoka ngai wana nazali kobondela,

Longola masumu na ngai nyonso,

E tika ete kobanda lelo

Nákóma mobimba wa Yo!

Ezali ngai kotambola na molili ya bomoi,

Mpe mawa ezingi ngai,

Zala Mokambi na ngai;

Tika ete molili éková pole,

Longola nsomo, kobanga,

Kotika te ete nábunga lisusu

Mosika na Yo.

³⁸² [Ndeko Branham abandi koyemba na nse ya mongongo *Kondima Na Ngai Etali Likolo Epai Na Yo*—Mok.] Bino baoyo bondimi, baoyo bobimisi liboso na Nzambe nyonso oyo ezalaki kati na bino, mpe bozui mokano ete eloko moko te ekopekisa bino lisusu, ete bokoloba lisusu te ete bozali na makoki moko, mpe bolingi kobongisa makambo, komibongisa mpenza mobimba liboso na Nzambe, ebátiselo ezali na mai kati na yango, eléngelami mpo na libatisi. Basi bákende na loboko na ngai ya mobali, mpe mibali na loboko na ngai ya mwasi. Mosala ya kobatisa elingi kobanda sikawa. Baoyo babimisi nyonso oyo ezalaki kati na bango, baoyo babelemi te mpo na kondima oyo batei bakoloba, oyo bakonzi ya mangomba bakoloba, oyo ba-denominations ekoloba, kasi bokolanda nzela ya Nkolo, bokondima YANGO ELOBI NKOLO, boya sikawa.

Ezali ngai kotambola na molili ya bomoi,

Basi bakoza na ngambo *oyo*, mibali na ngambo *oyo*. Yango nde kobengama na bino na etumbelo: “Bato nyonso oyo bandimaki, bayaki mpe bazuaki libatisi.”

. . . Mokambi na ngai;
Tika ete molili ékóma pole,
Longola mpisoli ya mawa,
Kotika te ete nábunga lisusu
Mosika na Yo.

³⁸³ Basi boni bazali awa na ntongo oyo . . . Nazali koloba yango na Nkombo na Nkolo Yesu! Boni kati na bino bozali koyoka nsóni mpo na suki ya mikuse oyo bozali na yango, bolingi ete Nzambe, na ngolu na Ye, ákólisa yango mpo na bino? Nzambe ápambola bino.

³⁸⁴ Mibali boni bozali koyoka nsóni mpo botikaki basi na bino bámela makaya, mpe bálata ba-patalon oyo ezalaka mpenza mpo na bino?

³⁸⁵ Mpe Biblia elobi: “Ezali mbindo na miso na Nzambe.” Boyebi ete Nzambe akoki kobongwana te? Akoki kobongwana te. Azalaka bebele na ezaleli moko, ezali bosantu. Akoki kobongwana te. Soki okómi lokola Ye te, okomona Ye te, “Kozanga bosantu, moto moko te akomona Nkolo.” Mpe soki kolata ba-patalon ezali . . . epesaka Nzambe mpasi mpenza mpe mposa ya kosánza, epesaka Ye mpasi, ná *mbindo*, “bosoto,” ndenge nini yo . . . oyo ozali na molimo ya ndenge wana kati na yo, okokóta na Lola ndenge nini? Okokóta na Lola ndenge nini ná nsuki bakátá, na ntango oyo Nzambe alobaki ete: “Ezali nsóni mpo na mwasi kokata nsuki na ye?” Azali koboya mitindo mpenza ya kozala mwa—mwasi. Nzambe abongwanaka te. Oyo wana ezali Liloba na Ye, moninga, malamú óyoka.

³⁸⁶ Mpe bino mibali oyo botikaka basi na bino básála makambo yango, bomiyókaka nsóni te? Boyókaka nsóni te?

³⁸⁷ Bózala lokola Mwasi ya Mokonzi ya mboka te. Bózala lokola Nzambe! Bomoni? Bóbimisa kati na bino lolenge nyonso ya makambo ya mokili oyo, mpo Klisto ákoka komísopa kati na yo mpe ókoka mpenza kotondisama na Molimo Mosanto.

³⁸⁸ Akoki kosala yango te, Akoki kosala yango te, ezali—ezali kotelemela mitindo na Ye; Akosengela kotelemela Liloba na Ye, mpe oyo wana Akosala yango te; Akosala yango te ntango nyonso oyo—oyo okológóbana na Liloba na Ye te. Osengeli kokóma . . . Tosengeli kokóma na Oyo wana liboso likambo mosusu ékoka kosasalema. Boyebi yango, bino nyonso boyebi yango. Bato boni bandimaka yango, bótombola maboko. Ya solo, bondimaka yango, sikawa tósala likambo moko mpo na yango.

³⁸⁹ E Nzambe, yókela biso mawa! Tozali mpenza na bosenga na Ye! Bisó oyo, biso nyonso elongo sikawa. Bomikanisela sikawa, na Esambiselo, soki ngai . . . nakosengela kotelema (mpe ekoki kosalema liboso butú éyinda) mpo na kokutana ná Liloba moko na moko oyo nasili koloba. Bomoni, nakosengela kokutana na Yango. Sikawa, bomikanisela ete lisumu na nko ezali na maboko na ngai te, ezali na lisosoli na ngai te, ezali na molimo na ngai te, ezali epai na Nzambe te.

³⁹⁰ Soki ozangi ko . . . Soki ozali na lolenge wana kasi ozali kaka koyoka te ete okweisami (fiu!), oko—oko—okosala nini? Na bongo, oyebi ete Nzambe azali kosala elongo na yo te, oyebi ete osíli koleka mosika na Yango. Bomoni? Osíli koleka Yango. Okoki na yo kozala mosambeli mpenza, okoki kozala moto ya mangomba mpe bongo na bongo, kasi osíli koleka Yango. Liloba na Nzambe ekitaka na kati ya moto mpo na kobimisa ye libanda. Yango nde esalaka ete ázonga. Bomoni? Boye, oyo wana ezali Liloba. Nasengi na motei nyonso, na moto nyonso, bisika nyonso, ete áwangana Yango ná Liloba na Nzambe. Ya solo. Ezali bongo te, bomoni.

³⁹¹ Na boye, tózala Baklisto ya solosolo. Ata biso baoyo tomekaka, baoyo tomekaka, tosengeli kokatama mpe kotokisama lisusu. Iyo, misie, biso nyonso tosengeli na yango.

³⁹² E Nzambe, yokela ngai mawa. E Nzambe, zua ngai mpe pesa ngai lolenge ya malamú. Ezali mposa ya motema na ngai, nsima na mposó oyo, ete nákende liboso na Nzambe, mpo náluka koyeba eloko oyo nasengeli kosala na nsima. E Nzambe, zua ngai. Nini . . . Nyonso—nyonso oyo etali ngai, mpe ezali mingi, oyo ezali malamú te, e Nzambe, longolá yango, yango nde libondeli na ngai na ntongo oyo. Kátá ngenga ya motema na ngai, ya matoi, ya bomoto na ngai. Kómisa ngai, Nkolo, kómisa ngai eloko oyo . . . nyonso oyo Alingi ete názala. Yango nde libondeli na ngai.

³⁹³ Nyonso oyo nasengeli kozala, kátá, kátá ngai, Nkolo. Lakisa ngai kati na Liloba, loba na ngai, nakokende kosala yango. Soki Nkolo alobi yango, ngai nako . . . ngai wana, nabelemi mpo na kolóngóbana na yango. Nyonso oyo Liloba na Nzambe elobi,

yango nde nalingi kozala. Nalingi kozala Mo—Moklisto kati na Liloba na Nzambe: “Kotika ete maloba nyonso ya moto ézala lokuta, mpe oyo ya Nzambe ézala solo.” Yango nde kolanda ngámbo ya eleko oyo, boye te? Ondimi yango ndenge wana?

³⁹⁴ Mwana, ozali koluka esika mpo na libatishi? Iyo, epai boye, ndeko, kozela te. Malamu, na ngambo oyo boye.

³⁹⁵ Mingi kati na bino basengelaki koya, mibali ná basi oyo bazali bandimi, baoyo bazali. . . bazali koyambola masumu na bango, mpo na kozua libatishi na Nkombo na Yesu Klisto. (Epai boye, ndeko.) “Na Nkombo na Yesu Klisto mpo na bolimbisi na masumu na bango, mpe bakotondisama na Molimo Mosanto.”

³⁹⁶ Sikawa, mpo na bino ba-Katoliko oyo bozali awa, yango nde bolimbisi ya masumu. Bino bolobaka ete lingomba ezali na nguya ya kolimbisa masumu, ndenge nini lingomba ezalaki kolimbisa masumu? Nzambe. . . Yesu nde ayebisaki lingomba: “Ye oyo bokolimbisa masumu na ye, ekolimbisamela ye. Ye oyo bokokangela ye yango, ekokangamela bango.” Ndenge nini bazalaki kolimbisa masumu na ebandeli, masumu na lingomba ya ebandeli? Babengaki bango na kobongola mitema, mpe babatisaki bango na Nkombo na Yesu Klisto mpo na bolimbisi ya masumu na bango. Na mwa ndako ya ntúbélá te; te, ata moke te. Kasi babóngólaki mitema liboso na Nzambe, na mitema na bango, ntango bazalaki wana, mpe bandimaki. “Mpe baoyo nyonso babatis— . . . bandimaki, babatisamaki na Nkombo na Yesu Klisto, mpe batondisamaki na Molimo Mosanto.” Amen. Bolingaka Ye?

Sikawa tótelema.

³⁹⁷ Sikawa, bato mingi bakolinga kozela mosala ya libatishi. Moto mosusu alingi koya, moto mosusu andimi? Yaka, na ngámbo nyonso mibale; mibali na loboko ya mwasi; na loboko ya mobali, basi. Bondimela Nkolo Yesu na motema mobimba, ná nyonso oyo ezali kati na bino.

³⁹⁸ Sikawa tógumba mito elongo, wana tozali kozóngela libondeli ya ndakisa oyo elongo, ndenge nakambami na lolenge mosu mpenza mpo na kosala yango sikawa. Wana togumbi mitó, bóbondela elongo na ngai:

Tata na biso Ozali na Likoló, Nkombo na Yo ébulisama.

Bokonzi na Yo éya. Mokano na Yo ésalema na mabelé, lokola na Likoló.

Pésa biso lelo bilei ya mokolo na mokolo.

Límbisa mabe na biso, lokola biso tolimbisaka baoyo basálaka biso mabe.

Sálisa biso ete tókwea na komekama te, kasi síkolá biso na mabe. Mpo Bokonzi, ná nguya ná nkembo ezali ya Yo, libela na libela. Amen.

³⁹⁹ Sikawa tókoba kogumba mitó. Mpe nakosenga na Ndeko Neville ete áya kosenga mapamboli, áloba oyo ezali na motema na ye, na nsima akopésa liyebisi mpo na mosala ya libatisi oyo ezali kolengelama sikawa.

⁴⁰⁰ Nzambe ápambola bino, yango nde libondeli na ngai. Ngai nakobondela mpo na bino, bino mpe bóbóndela mpo na ngai. Nasengeli mpenza na mabondeli na bino. 🐦

61-1119 Makasi Ebongi Be Na Nzela Na Bolembu Ebongi Be
Branham Tabernacle
Jeffersonville, Indiana U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org